

詩經傳說彙纂


國風

三

內閣文庫		漢書
一〇二五	冊	類
二七五函	架	號

太政官文庫		漢書門
一〇二五	冊	號
一〇〇	架	函

內閣文庫	
番號	漢 1025
冊數	100 (46)
函號	275 207



欽定詩經傳說彙纂卷第一

明治十年購求

國風一

孔氏穎達曰。詩國風。是大師所題也。○劉氏瑾曰。集傳於國風之下。係以一者。以國風居

四詩之首也。下文周南一之一者。周南又居國風中十五國之首也。


集傳國者。諸侯所封之域。而風者。民俗歌謠之詩也。

謂之風者。以其被上之化。以有言。而其言又足以感

人。如物因風之動。以有聲。而其聲又足以動物也。是

以諸侯采之以貢於天子。天子受之而列於樂官。於

以考其俗尚之美惡。而知其政治之得失焉。朱子曰。男女相



與詠歌以言其情。行人振木鐸，徇路采之。何休云：男
年六十，女年五十，無子者，官衣食之，使采詩。邑移於
國，國以聞。舊說二南為正風，所以用之。閨門鄉黨，邦
於天子。

國而化天下也。

程子曰：二南之詩，為教於衽席之上。閨門之內，上下貴賤之所同也。故用

之鄉人邦國。而謂之正風。十三國為變風，則亦領在樂官，以時存

肄，備觀省而垂監戒耳。合之凡十五國云。

朱子曰：變風多是淫

亂之詩。故班固言男女相與詠歌，以言其情者，聖人
存此，亦以見上失其教，則民欲動情勝其弊至此。故
曰：詩可以觀也。○劉氏瑾曰：男女亂倫，而邶鄘衛鄭
之風變。君臣失道，而王豳之風變。畋遊荒淫，而齊國
之風變。儉嗇褊急，而魏國之風變。以至唐風變而憂
傷，秦風變而武勇，陳風變而淫遊，歌舞檜曹之風變。

而亂極思治。此十三國風之大槩也。然變詩雖不可
以風化天下，而亦各有音節，如季札所觀是已。故樂
官兼掌其詩，使夫學者時習之，以自
省而不知所戒，蓋亦莫非所以為教也。

集說

匡氏衡曰：室家之道修，則天下之理得。故詩始
國風，原性情而明人倫也。○鄭氏樵曰：古者三

百篇之詩，皆可歌。歌則各從其國之聲。周召王豳之
詩，同出於周，而分為四國之聲。邶鄘衛之詩，同出於
衛，而分為三國之聲。蓋采詩之時，得之周南者，繫之
周南，得之召南者，繫之召南，得之王城與豳者，繫之
王城與豳，得之邶鄘衛者，繫之邶鄘衛。蓋歌則各從
其國之聲，何彼穠矣之詩，何以不列於王風。蓋為詩
之時，則東周也。采詩之地，則召南也。故列之召南。黍
離之詩，何以不列之於二南。蓋周大夫行役，至於宗
周之地，閱其壞而思其舊，其詩雖作於西周，其人則
東周也。故列之王風乎。王何以不曰雅，以其地則東

周也。幽厲何以不曰風。以其地則西周也。如此則木
 瓜雖美齊而在衛。猗嗟雖刺魯而在齊。泉水載馳等
 詩皆衛詩而在邶。邶。召穆之民勞。衛武之賓之初筵。
 不附其國而在二雅。皆以聲別也。夫風之詩出於土
 風。而雅之詩則出於朝廷。大夫爾。文武之詩見於風
 者。二南是也。成王之詩見於風者。豳風是也。平王之
 詩見於風者。王風是也。雅頌之音與天下同。列國之
 音隨風土而異。若謂降黍離而為國風。則豳詩亦可
 降耶。大抵詩有三百。皆以聲別。古人采詩之時。隨其
 國而繫之。聖人無容心於其閒也。至於稱其國之名
 號亦然。如三監之地。自康叔得國。已統於衛。今其詩
 之在頃襄文武者。亦分而為三。不專曰衛。唐叔封唐
 在燮父時。已為晉矣。至春秋時。實有其詩。今其目乃
 為唐也。七月以後。多為周公作。今其詩乃皆為豳。在
 盤庚時。商已為殷。故頌其殷武。今其頌乃皆為商。得
 於其地。繫於其國云爾。夫子曰。吾自衛反魯。然後樂

正。雅頌各得其所。夫謂雅頌各得其所。可也。而謂樂
 正者。何哉。蓋樂者。鄉樂也。鄉樂。即風詩也。十五國風
 之中。惟邶。鄘。衛。其國相近。其聲相似。不比周。召。王。豳。
 猶有隔絕。夫子平時。見魯大師所傳三國之聲。時有
 異同。及其環轍之時。見衛人所歌之聲。從而正之。故
 鄉樂曰正。而雅頌。但曰得所。其意如此。所以詩有十
 五。此國風之別也。○王氏柏曰。國風者。周為商。列國
 之風也。曰王風者。周王天下以後之風也。凡在下之
 作。槩謂之風。初不系周之盛衰也。當周盛時。風如二
 南。及其衰也。風如黍離。何獨平王以後。雅始降。而為
 風乎。○鄧氏元錫曰。周公作樂。定二南為化本。因列
 國山川封域。次國風。列之樂官。以導化移俗。大師所
 歌。列國風之次第是也。其後迹熄。詩亡。孔子博采存
 者。表二南為風始。其列國詩。繫善敗得失之原。為興
 替存亡之統。足垂勸戒者。頗更定其第次。
 以表裏乎春秋。則今經國風之所以教也。

周南一之一

名南說附

集傳周國名南南方諸侯之國也周國本在禹貢

雍州境內岐山之陽后稷十三世孫古公亶父始

居其地

劉氏瑾曰棄為后稷封於郃其後公劉遷豳至古公又遷於岐山之下

傳子

王季歷至孫文王昌辟國寢廣於是徙都於豐而

分岐周故地以為周公旦召公奭之采邑

顏氏師古曰采

官也。因官食地。故曰采地。

且使周公為政於國中而召公宣布

於諸侯

司馬氏貞曰周地本大王所居以為公旦采邑故曰周公奭食邑於召故曰召公蓋

文王取岐周故墟分爵二公也。○孔氏穎達曰文

王若未居豐則岐邦自為都邑明知分賜二公在

作豐之後且二南文王之詩而分繫二公若文王

不賜采邑不使行化安得以詩繫之故知此時賜

之於是德化大成於內而南方諸侯之國江沱汝

漢之間莫不從化蓋三分天下而有其二焉

鄭氏曰雍梁荆豫徐揚之人咸被其德而從之。○孔氏

穎達曰其餘冀青兗屬紂是為三分有二也。至

子武王發又遷於鎬遂克商而有天下武王崩子

成王誦立周公相之制作禮樂乃采文王之世風

化所及民俗之詩被之箎弦以為房中之樂而又

推之以及於鄉黨邦國。王氏安石曰。凡詩用於天子者。諸侯不得用。用於諸

侯者。大夫不得用。此關雎鄉人。邦國皆得用者。以之正夫婦也。所以著明先王風

俗之盛。而使天下後世之脩身齊家治國平天下

者。皆得以取法焉。蓋其得之國中者。雜以南國之

詩。而謂之周南。言自天子之國。而被於諸侯。不但

國中而已也。其得之南國者。則直謂之召南。言自

方伯之國。被於南方。而不敢以繫於天子也。章氏俊卿

曰。周南召南。樂章之名也。文王之化。自北而南。及於江漢。故作樂者。采自北以南土風。而名之曰南。

用為燕樂鄉樂射樂房中樂。所以彰文王之化也。

○劉氏瑾曰。其詩得於國中者。多為文王后妃而

作。故雜以南國漢廣汝墳二詩。而謂之周南。所謂

自天子之國。被於諸侯者。不敢使周公食邑之號

專主其風也。然周公之事。固統於其所尊矣。觀下

文。復取小序繫之周公之說。可互見也。若召公則

宣化於諸侯。故以侯國之詩繫之。而謂之召南。正

以其食邑之號。專主之也。謂召公為方伯之國。謂

豐邑為天子之國者。皆通乎。岐周。在今鳳翔府岐

山縣。皇輿表。屬陝西。豐。在今京兆府鄠縣。皇輿表。屬陝西。終

南山北南方之國。即今興元府京西湖北等路諸

州。皇輿表。宋興元府。今陝西漢中府。宋京西路。今湖廣安陸襄陽鄖陽德安諸府。河南歸德河南

南陽汝寧諸府及汝州。宋湖北路。今湖廣武昌。漢陽安陸德安荆州岳州常德辰州諸府。鎬在

豐東二十五里。小序曰。關雎麟趾之化。王者之風。

故繫之周公。南言化自北而南也。鵲巢騶虞之德。

諸侯之風也。先王之所以教。故繫之召公。斯言得

之矣。

集說

馬氏融曰。二南。國風之始。三綱之首。王教之端。鄭氏康成曰。周召者。雍州岐山之陽地名。地形險阻。而原田肥美。周之先公曰大王。自豳始遷焉。修德建王業。商王帝乙命其子王季為西伯。至紂又命文王典治南國之諸侯。故雍梁荆豫徐揚之人咸被其德而從之。文王受命作邑于豐。

乃分岐邦周召之地。為周公召公采地。施先公之教。於已所職之國。武王定天下。巡守述職。陳誦諸國之詩。以觀民風俗。六州者。得二公之德。教尤純。故獨錄之。屬之犬師。分而國之。其得聖人之化者。謂之周南。得賢人之化者。謂之召南。言二公之德。教自岐而行於南國也。謂為風之正經。初古公亶父。聿來胥宇。爰及姜女。其後犬任思。婚周姜。犬姒嗣徽音。歷世有賢妃之助。以致其治。文王刑于寡妻。至于兄弟。以御于家邦。是故二國之詩。以后妃夫人之德為首。終以麟趾騶虞。言后妃夫人有斯德。與助其君子。皆可以成功。至於獲嘉瑞。○孔氏穎達曰。周召之地。共方百里。而皆名曰周。其召是周內之別名也。孔叢子云。羊容問於子思曰。古之帝王。中分天下。而二公治之。謂之二伯。周自后稷封為諸侯。奚得為西伯乎。子思曰。吾聞諸子夏云。殷王帝乙之時。王季以九命作伯於西。受圭瓚。秬

魯之賜。故文王因之得專征伐。此諸侯為伯。猶周
 召分陝。○文王繼父為州伯。化行乎江漢之域。若
 非受紂之命。其化無以及之。江漢之域。即梁荆二
 州。故尚書注云。南兼梁荆。其後化廣民附。三分有
 二。不必皆紂命也。○言王者之風。是得聖人之化
 也。言諸侯之風。是得賢人之化也。以周公聖人。故
 以聖人之風繫之。以召公賢人。故以賢人之風繫
 之。先聖後賢。故先周後召也。不直稱周召而連言
 南者。欲見行化之地。作詩之處也。且直言周召。嫌
 主美二公。故竝皆云南也。此詩既繫二公。即二公
 為其詩主。若有美二公。則各從其國。甘棠之在召
 南。是其事也。周南無美周公。或時不作。或錄不得
 也。○此實文王之詩。而繫之二公者。志張逸問王
 者之風。王者當作雅。在風何。答曰。文王以諸侯而
 有王者之化。述其本。宜為風也。逸以文王稱王。則
 詩當在雅。鄭以此詩述文王為諸侯時事。以有王

化。故稱王者之風。於時實是諸侯也。化霑一國。謂
 之為風。道被四方。乃名為雅。文王纔得六州。未能
 天下統一。此二南之人。猶以諸侯待之。為作風詩。
 不作雅體。體實是風。不得謂之為雅。○天子之妃
 曰后。諸侯之妃曰夫人。以周南王者之化。故稱后
 妃。召南諸侯之化。故稱夫人。直以化感為名。非為
 先後之別。○二風皆是文王之化。大姒所贊。周南
 以桃夭至芣苢三篇。為后妃所致。漢廣以下。其事
 差遠。為文王之致。召南以草蟲至行露四篇。為夫
 人所致。羔羊以下。差遠。為文王之致。各舉其事。互
 相發明。此二南之詩。文王時作。文王即位。至受命
 之時。已四十餘年。諸侯從之。蓋亦早矣。是受命之
 前。已行王德。當此之時。詩已作也。何則。化被於下。
 則民述其志。何須待布王號。然後作歌。武王采得
 之時。二公已有爵土。命其行化。遂分繫之。非由二
 公有土。此詩始作也。周召二十五篇。唯甘棠與何

彼穠矣二篇。乃是武王時作。○蘇氏轍曰。周公在內。近於文王。雖有德而不見。則其詩不作。召公在外。遠於文王。功業明著。則詩作於下。然則謂之周召者。蓋因其職而明之也。謂之南者。文王在西而化行於南國。以其及之者言之也。東北則紂之所。在。文王之初所不能及也。○鄭氏樵曰。二南之詩。本於所得之地而繫之歌。則從二南之聲。二南皆出於文王之化。言王者之化。自北而南。周召二公。未嘗與其間。二南之詩。後世取於樂章。用之為燕樂。為鄉樂。為射樂。為房中之樂。所以彰文王之德美也。故曰。夫武始而北出。再成而滅商。三成而南。南之為義。蓋如是也。五成而分。周公左。召公右。周召南之為義。蓋如是也。○范氏處義曰。二南諸篇。皆本其所得之地而錄之。彼區區欲分周南召南。以為聖賢淺深者。未為通論也。且周南召南。皆陳文王大妣風化之效。難以優劣論。如周南言道化

行。召南亦言王道成。周南言文王之道。被於南國。召南亦言天下純被文王之化。以是知二南之論風化。亦互見之耳。然周公止稱公。召公乃稱伯。豈召公後嘗典治南國之諸侯乎。抑嘗考國風終於美周公。二雅終於思召公。則聖人刪詩之際。傷衰亂之極。非周召不能救也。蓋與首二南同意。○朱子曰。周南言文王閨門之化。召南言諸侯夫人大。夫妻被文王后妃之化。而成德之事。蓋詩之正風也。○詩言文王之德者。繫之周公。以周公主內治。故也。言諸侯之國。被文王之化。以成德者。繫之召公。以召公長諸侯故也。○呂氏祖謙曰。程子以周南召南。猶易之有乾坤。取其有承乾之義。周召乃詩之綱領。乾坤其易之門。○黃氏樵曰。說詩者曰。關雎麟趾之化。繫之周公者。自陝以東。周公主之。鵲巢騶虞之化。繫之召公者。自陝以西。召公主之。陳少南又謂文王撫有西戎。南化江漢。天下既一。

則分岐東於周公。分岐西於召公。一東一西。皆以北為上。自上而下。故言自北而南。李迂仲亦從其說。吾不知文王所以分地於二公者。果請之天子而與之耶。抑不請之天子而自與之耶。且當是時。紂猶天子。文王猶諸侯。文王居羨里而繫易辭。其志可見。安有紂猶在上。而文王擅分其地以與人哉。或者又以謂文王受命稱王。於是乎分陝。不知武王未得天下。則但曰文考而已。曷嘗王哉。少南迂仲。皆嘗言文王未嘗受命稱王。而又自謂分陝於二公。何其自戾也。先儒但見孔子論文王三分天下有其二。故信分陝之說而不疑。不知孔子所謂有其二者。但謂二分民心。已歸文王。非有其地也。子謂分陝當在武王既得天下之後。不當在文王之時。二南之繫。當在二公既分陝之後。○真氏德秀曰。二南用之房中。所以閑邪僻而養中正也。○嚴氏粲曰。詩經首二南。見夫婦之倫焉。見王道

之端焉。二南繫周召。見君臣之倫焉。見文王心術之微。盛德之至焉。

關關雎七余反。鳩在河之洲。鳥了反。窈窕淑女。君

子好逑。音求

集傳 興也。關關。雌雄相應之和聲也。雎鳩。水鳥。一名王

雎。狀類鳧鷖。今江淮間有之。左傳。少皞氏以鳥名官。雎鳩氏。司馬也。杜預注。摯而有別。故為司馬主法制。○陸氏璣曰。雎鳩。幽州人謂之鷖。而揚雄許慎皆曰白鷖。似鷹。尾上白。○郭氏璞曰。雎鳩。鷓類。今江東呼之為鷓。好在江邊。沚中。亦食魚。生有定偶。而不相亂。偶常竝

遊而不相狎。故毛傳以為摯而有別。鄭氏康成曰。摯之言至也。謂王雎之

鳥雌雄情意至然而有別。○歐陽氏修曰。毛公曰。鳥摯而有別。不取其摯。取其別也。雉鳩之在河洲。聽其聲則和。視其居則有別。此詩人之所取也。○朱子曰。雉鳩。毛氏以為摯而有別。一家作猛鷲。說謂雉鳩是鷲之屬。鷲自是沈鷲之物。恐無和樂之意。蓋摯與至同。言其情意相與深至而未嘗狎。便見其樂而不淫之意。列女傳以為人未嘗見其乘居而匹處者。蓋其性然也。朱子曰。嘗見人說淮上一般水禽。名王雉。雖有兩箇相隨。然相離每遠。此說却與列女傳所引義合。○乘居。謂四箇同居也。河。北方流水之通名。洲。水中可居之地也。窈窕。幽閑之意。鄒氏泉曰。幽。有深潛不露意。閑。有安靜自如意。言幽閑而又言貞靜。蓋貞靜乃幽閑之本。在內為貞靜。在外為幽。淑。善也。女者。未嫁之稱。蓋指文王之妃大閑。非有二也。

姒為處子時而言也。君子則指文王也。好亦善也。速。匹也。毛傳之摯字與至通。言其情意深至也。○興者。先言他物以引起所詠之詞也。周之文王。生有聖德。又得聖女。姒氏以為之配。宮中之人。於其始至。見其有幽閑貞靜之德。故作是詩。言彼關關然之雉鳩。則相與和鳴於河洲之上矣。此窈窕之淑女。則豈非君子之善匹乎。言其相與和樂而恭敬。亦若雉鳩之情摯而有別也。後凡言興者。其文意皆放此云。朱子曰。興。起也。引物以起吾意。如雉鳩之摯而有別之物。

引此起興。猶不甚遠。其他亦有全不相類。只借物而起。吾意者。雖皆是興。與此又略不同也。○呂氏祖謙曰。首章以雉鳩發興。後章以荇菜發興。至於雉鳩之和靜。荇菜之柔順。則又取以為比也。漢匡衡曰。窈窕淑女。君子好逑。言能致其貞淑。不貳其操。情欲之感。無介乎容儀。宴私之意。不形乎動靜。夫然後可以配至尊而為宗廟主。此綱紀之首。白虎通曰。三綱。君臣父子夫婦也。六紀。諸父兄弟族人。諸舅師長朋友也。綱。張也。紀。理也。大綱。小紀。所以張理上下。整齊大道也。王教之端也。可謂善說詩矣。

集說

毛氏萇曰。后妃說樂君子之德。無不和諧。慎固幽深。若關雎之有別焉。后妃有關雎之德。是幽閑貞

專之善女。宜為君子之好匹。○程子曰。關雎之義。樂得淑女以為后妃。配君子也。其所憂思。在於進賢淑。非說於色也。哀窈窕。思之切也。切於思賢才。而不在於淫色。無傷善之心也。思之甚切。以常人言之。直入於邪。關雎却止乎禮義。哀不至於傷。則其思也。亦異乎常人之思矣。後人以為后妃樂得淑女以配君子。配惟后妃可稱。后妃自是配。更何別求淑女以為配。淫其色。乃男子之事。此自關雎之義如此。非謂后妃也。○黃氏樵曰。關雎雖鳩。詩人之意。取其和鳴。學者以猛鷲求之。其氣象大不侔。不淫其色。乃關雎之義。不足以形容后妃之德也。○嚴氏粲曰。雉鳩有關關然之聲。在河中之洲。遠人之處。與后妃德音聞於外。而身居深宮之中也。大姒有徽音。故以關關興之。此窈窕幽閑之善女。足以為君子之良匹也。言大姒之賢。而文王齊家之道可見矣。○朱氏善曰。文王聖人也。而詠其德者。一言以蔽之。不過曰敬而已。大姒聖女也。而詠其德者。一言以蔽之。不過曰淑

而已。蓋能敬則能自強不息。純亦不已。所以為乾之健也。能淑則足以配至尊。奉宗廟。所以為坤之順也。故曰窈窕淑女。君子好逑。言能體坤道之順以承乾也。○黃氏佐曰。聽內治以明章婦順。內和而家理。聽外治以明章男教。外和而國治。實自此始。此好逑之義也。

附錄

鄭氏康成曰。言后妃之德和諧。則幽閑處深宮貞德不嫉妒。謂三夫人以下。○孔氏穎達曰。關雎之篇。說后妃心之所樂。樂得此賢善之女。以配已之君子。心之所憂。憂在進舉賢女。不自淫恣其色。又哀傷處窈窕幽閑之女。未得升進。思得賢才之人。與之共事君子。勞神苦思。而無傷害善道之心。此是關雎詩篇之義也。

○參

初金反

差

初宜反

荇

行猛反

菜。左右流之。窈窕淑女。

寤寐求之。求之不得。寤寐思服。叶蒲北反悠哉悠哉。

輾哲善反轉反側。

傳興也。參差。長短不齊之貌。荇。接余也。根生水底。莖

如釵股。上青下白。葉紫赤。圓徑寸餘。浮在水面。陸氏璣曰。鬻其

白莖。以苦酒浸之。脆美可案酒。○李氏樗曰。荇菜。是水有之。黃花。葉似蓴。可為菹。或左或右。言

無方也。流。順水之流而取之也。程子曰。左右皆隨水之貌。○嚴氏粲曰。流。流水

也。流之。謂於流水以潔之也。○陳氏推曰。左右是尋此索彼之謂。故曰無方。或寤或寐。言無

時也。毛氏萇曰。寤。覺寐。寢也。服。猶懷也。悠。長也。王氏安石曰。悠者。思之長也。○惟其

以得淑女為樂。故其求之而不得，則哀思也。輾者轉之半，轉者輾之周。反者

輾之過，側者轉之留。皆臥不安席之意。鄭氏康成曰：臥而不周曰輾。○

孔氏穎達曰：反側猶反覆。輾轉猶婉轉。○此章本其未得而言。彼參差之

荇菜，則當左右無方以流之矣。此窈窕之淑女，則當寤寐不忘以求之矣。蓋此人此德，世不常有，求之不得，則

無以配君子而成其內治之美。故其憂思之深，不能自已。至於如此也。

集說

程子曰：荇菜以興后妃之柔順。○朱子曰：此詩看來是妾媵做，所以形容得寤寐反側之事。外人做

不到此。

附錄

毛氏萇曰：流，求也。后妃有關雎之德，乃能共荇菜。備庶物，以事宗廟也。○鄭氏康成曰：左右，助也。言后妃將共荇菜之菹，必有助而求之者。○言后妃覺寐，則常求此賢女，欲與之共已職也。

○參差荇菜，左右采之。窈窕淑女，琴瑟友之。

叶羽反之。參差荇菜，左右芼之。窈窕淑女，鐘

鼓樂之。音洛

集傳

興也。采取而擇之也。芼，熟而薦之也。禮內則芼羹注。以菜雜肉

為羹也。又雉兔皆有芼注。琴，五弦。或七弦。瑟，二十五弦。雉羹兔羹，皆有菜以芼之。

皆絲屬樂之小者也。

邢氏曷曰。琴長三尺六寸六分。五弦。後加文武二弦。雅瑟長八尺一

寸。廣一尺八寸。二十五弦。其常用者十九弦。頌瑟長七尺一寸。廣一尺八寸。二十五弦。盡用。○段氏昌武曰。明

堂位曰。大琴大瑟。中琴小瑟。四代之樂器也。古人用大琴。必以大瑟配之。用中琴。必以小瑟配之。然後大者不

陵。細者不抗。友者親愛之意也。○鄭氏康成曰。同志為友。而五聲和矣。鐘鼓有時而奏。琴瑟無時。鐘。金屬鼓。革屬樂之大者

也。鐘鼓有時而奏。琴瑟無時。鐘。金屬鼓。革屬樂之大者。而不在側。若朋友然。故曰友。

也。樂則和平之極也。

鄭氏康成曰。琴瑟在堂。鐘鼓在庭。○孔氏穎達曰。皋陶謨云。琴瑟以

詠。乃云。下管鼗鼓。明琴瑟在上。鼗鼓在下。大射禮。頌鐘在西階之西。笙鐘在東階之東。是鐘鼓在庭也。○胡氏

紹曾曰。周禮有繆樂燕樂之鐘。此其燕樂與。或云琴瑟於闈門燕居之時。鐘鼓於朝庭。贊見之際。然若止以琴

瑟。鐘鼓為樂。其樂易盡。樂其德之有合。則可暢於天下矣。○此章據今始得而言。彼

參差之荇菜。既得之。則當采擇而亨芼之矣。此窈窕之

淑女。既得之。則當親愛而娛樂之矣。蓋此人此德。世不

常有。幸而得之。則有以配君子而成內治。故其喜樂尊

奉之意。不能自已。又如此云。

傳說 孔氏穎達曰。以琴瑟相和。似人情志。故以友言之。鐘鼓鏗宏。非情志可比。故以樂言之。○程子曰。琴

瑟友之。鐘鼓樂之。言后妃之配君子。和樂如此也。○徐氏鳳彩曰。琴瑟。堂上之樂。與歌聲洽比者也。得相親密。

故曰友。鐘鼓。堂下之樂。以始八音者也。更為宣暢。故曰樂。

附錄

孔氏穎達曰。此稱后妃之意。后妃言已思此淑女。若來已宜以琴瑟鐘鼓友樂之。假設之辭也。○蘇氏轍曰。窈窕淑女不可得也。苟其得之。則將友之樂之。庶其肯從我也。此求之至也。

總論

程子曰。樂得淑女以配君子。不淫其色。是樂而不淫。哀窈窕。思賢才。求之不得。輾轉反側。是哀而不傷。○呂氏祖謙曰。后妃之德。坤德也。萬化之源。一本諸此。未得之也。如之何其勿憂。既得之也。如之何其勿樂。○輔氏廣曰。此皆是興而兼比。首章以關雎起興。因以關雎摯而有別。為比。二章三章以荇菜起興。亦以荇菜為比。但先儒皆取於荇菜之潔淨柔順。而集傳只言其不可不求者。豈非正以其潔淨柔順之故乎。○朱氏公遷曰。一章美后妃之德。二三章則詩人自言其憂思喜樂之當然。初無與於文王。而文王之化自見矣。

關雎三章一章四句二章章八句

孔氏穎達曰。關雎者。

詩篇之名。金滕云。公乃為詩以貽王。名之曰鴉。然則篇名皆作者所自名。各篇之例。多不過五。少纔取一。或偏舉兩字。或全取一句。亦有捨其篇文。假外理以定稱。○自古有篇章之名。故那序曰。得商頌十二篇。東山序曰。一章言其完是也。句則古者謂之言。論語云。一言以蔽之。曰思無邪。則以一句為一言也。秦漢以來。眾儒各為訓詁。乃有句稱。論語注云。此我行其野之句是也。句者。聯字以為言。則一字不制也。故詩之見句。少不減二。即祈父。肇禋之類也。三字。綏萬邦。屢豐年之類也。四字者。關關雎鳩。窈窕淑女之類也。五字者。誰謂雀無角。何以穿我屋之類也。六字者。昔者先王受命。有如召公之臣之類也。七字者。如彼築室于道謀。尚之以瓊華乎而之類也。八字者。十月蟋蟀入我牀下。我不敢傲我友自逸是也。其外更不見九字十字者。由聲度闡緩。不協金石也。句字之數。四言為多。

唯以二三八者。將由言以申情。唯變所適。播之樂器。俱得成文。故也。章者。積句所為。不限句數。以其作者陳事。須有多少。章總一義。必須意盡而成。故也。累句為章。則一句不可。二句得為之。其多者三十八句。自外不過也。篇之大小。隨章多少。風雅之中。少猶兩章以上。多則十六以下。唯周頌三十一篇。及那烈祖。玄鳥。皆一章者。以其風雅敘人事。一章不盡。重章以申殷勤。頌者。太平德洽之歌。直言寫志。不必殷勤。故一章而已。魯頌不一章者。魯頌美僖公之事。非告神之歌。亦殷勤而重章也。高宗一人。而玄鳥一章。長發。殷武。重章者。或詩人之意。所作不同。明成功有大小。其篇詠有優劣乎。立章之法。不常厥體。或重章共述一事。或一事疊為數章。或初同而未異。或首異而未同。或事訖而更申。或章重而事別。一章而再言。三章而一發。或篇有數章。章句眾寡不等。章有數句。句字多少不同。

皆由各言其情。故體無恒式也。

集傳 孔子曰。關雎樂而不淫。哀而不傷。愚謂此言

為此詩者。得其性情之正。聲氣之和也。問關雎樂而不淫。哀而不傷。是詩人性情如此。抑詩之詞意如此。朱子曰。是有那情性。方有那詞氣聲音。又曰。樂止於琴瑟。鐘鼓是不淫也。若沉湎淫泆。則淫矣。憂止於輶轉反側。是不傷也。若憂愁哭泣。則傷矣。此是得性情之正。○輔氏廣曰。哀樂情之發也。心不宰焉。則流於傷與淫而不自知矣。關雎之詩。感於性。發於情。而宰於心者也。其形於聲詩。播諸音樂。皆得其和且正焉。

蓋德如雎鳩。摯而有別。則后妃性情之正。固可以見其一端矣。至於

寤寐反側。琴瑟鐘鼓。極其哀樂。而皆不過其則焉。則詩人性情之正。又可以見其全體也。獨其聲氣之和。有不可得而聞者。雖若可恨。然學者姑卽其詞而玩其理。以養心焉。則亦可以得學詩之本矣。

輔氏廣曰。樂不淫。哀不傷。論語集注只說作詩者之性情。而此兼言后妃之性情者。蓋并首章言之也。聲氣之和。指其發於言以至播於八音以成樂而言也。○饒氏魯曰。一章言文王有聖德。而后妃亦有聖德。可爲之配。二章推言未得犬妣之時。求之如此其切。三章言始得后妃之時。喜之如此其至。自他詩觀之。言哀者易至於悲傷。如澤陂之詩曰。有美一人。傷如之何。寤寐無爲。涕泗滂沱。是也。

言樂者易至於淫泆。如溱洧之詩曰。洧之外。洵訏且樂。惟士與女。伊其相謔。贈之以芍藥。是也。惟此詩得情性之正。故玩其詞。可爲養心之助也。○劉氏辰翁曰。夫子自衛反魯。考禮正樂。其時師摯在魯。爲夫子歌周南。故曰師摯之始。關雎之亂。洋洋乎盈耳哉。今世所存之詩。特其詞與義耳。詩之詞未嘗亡也。其聲亡也。○劉氏瑾曰。首章取興。見樂而不淫。是后妃性情之一端也。二章三章所言。一哀一樂。皆不過則。是詩人性情之全體也。蓋由后妃與詩人性情之正如此。故發於詩歌。播之音樂。宜其聲氣之無不和矣。然樂者所以節夫詩之聲。而有音律以養人耳。歌詠以養人心。舞蹈以養血脈。此樂之全體也。古樂旣亡。則此詩聲氣之和。所以樂不淫。哀不傷者。固不得聞。而其所以養心者。幸有詩詞之可玩。則亦尚存樂之一端。而可爲學詩之本也。

○匡衡曰。妃音匹

之際輔氏廣曰。妃匹。猶言匹耦也。生民之始。萬福之原。昏姻之

禮正。然後品物遂而天命全。孔子論詩。以關雎為

始。言大上者。民之父母。后夫人之行。不侔乎天地。

則無以奉神靈之統。而理萬物之宜。自上世以來。

三代興廢。未有不由此者也。

集說 韓氏嬰曰。子夏問曰。關雎何以為國風始也。

孔子曰。關雎至矣乎。仰則天。俯則地。德之所藏。道之所行。大哉關雎之道也。萬物之所繫。羣生之所懸命也。天地之間。生民之屬。王道之原。不外此矣。子夏喟然歎曰。大哉關雎。乃天地之基也。○班氏固曰。周之興也。以姜嫄及大任大姒。故易基

乾坤。詩首關雎。書美釐降。夫婦之際。人道之太倫也。○朱子曰。主於德而言。則樂而不淫。哀而不傷。主於色而言。則樂必淫。哀必傷。此幾微之理。毫釐之辨。善養心者。審諸此而已矣。○讀關雎詩。便使人有齊莊中正意思。所以冠乎三百篇。與記言毋不敬。書言欽明文思皆同。○當時人被文王大姒德化之深。不覺形容歌詠如此。故當作樂之時。引為篇首。以見一時之盛。為萬世之法。尤其是感人妙處。○詩意只是疊疊推上去。因一事上有一事。一事上又有一事。如關雎形容后妃之德如此。又當知君子之德如此。又當知詩人形容得意味深長如此。又當知所以齊家。所以治國。所以平天下。人君則必當如文王。后妃則必當如大姒。其原如此。○問曹叔暹曰。君舉所說詩。謂關雎如何。對曰。謂后妃自謙不敢當君子。謂如此之淑女。方可為君子之仇匹。這便是后妃之德。曰。鄭氏自如此說了。

熹看來恁地說也得。只是覺得偏主一事。無正大之意。關雎如易之乾坤。意思如何得恁地無方際。如下面諸篇。却多就一事說。這只反覆形容后妃之德。而不可指說道甚麼是德。只恁地渾淪說。這便見后妃德盛難言處。○黃氏樵曰。周人但以關雎之詩。形容后妃。初不指后妃而謂之關雎也。曰樂曰憂曰哀。皆詩人樂之憂之哀之也。

案古者后立三夫人。九嬪。二十七世婦。八十一御妻。乃所以理陰德。治內事。章女教。賓祭之事。皆后夫人供之。而衆嬪御佐之。非得淑女。不足以稱其職。后妃思得淑女。以自助而事君子。未得而求思之深如此。設若既得而和樂之。淡如此。此其所以爲女德之至盛。而足以爲風教之首也。自毛鄭而後。從此說者衆。至朱子不主后妃自作。蓋因君子好述之語。以爲非衆嬪御所可當。且專主一事。其義爲狹。論固宏遠矣。然亦未嘗以鄭氏爲

非也。今以朱傳爲宗。而仍附其說於章末。俾後之學者。見自有關雎詩。以迄漢唐諸儒之論。蓋如此。

葛之覃兮。施

以豉反

于中谷。維葉萋萋。黃鳥于飛。

集于灌木。其鳴喈喈。

叶居奚反

集傳

賦也。葛草名。蔓生。可爲絺綌者。覃。延。施。移也。中谷。

谷中也。

孔氏穎達曰。中谷倒其言者。古人語皆然。詩文多此類也。

萋萋。盛貌。黃鳥。鸚

也。毛氏萇曰。黃鳥。搏黍也。○陸氏璣曰。黃鸚留也。或謂之黃栗留。幽州人謂之黃鶯。一名倉庚。一名商庚。一

名鶯黃。一名楚雀。齊人謂之搏黍。當甚熟時。來在桑間。故里語曰。黃栗留。看我麥黃甚熟。亦是應節趨時之鳥也。

灌木。叢木也。喈喈。和聲之遠聞也。○賦者。敷陳其事也。

而直言之者也。蓋后妃既成絺綌而賦其事。追敘初夏之時。葛葉方盛。而有黃鳥鳴於其上。也。後凡言賦者。放此。

集說 毛氏萇曰。葛所以為絺綌。女功之事。煩辱者。○歐陽氏修曰。后妃見葛生鳥鳴。因時感事。樂女功之

將作。○蘇氏轍曰。葛者。婦人之所有事也。詠歌其所有事。而又及其所聞見也。○嚴氏粲曰。葛初生之時。未可刈也。而已動女功之思。見念念不忘也。先時感事。乃幽民艱難之俗。今以后妃之貴。而志念如此。豈復有一毫貴驕之習邪。味詩人言外之意。可以見文王齊家之道矣。

○葛之覃兮。施于中谷。維葉莫莫。是刈是

魚廢反

獲胡郭反為絺恥知反為綌去逆反叶服之無斃音亦叶

集傳 賦也。莫莫。茂密貌。刈。斬。獲。煮也。精曰絺。麤曰綌。斃。

厭也。○此言盛夏之時。葛既成矣。於是治以為布。而服之。無厭。蓋親執其勞。而知其成之不易。所以心誠愛之。雖極垢弊。而不忍厭棄也。

集說 毛氏萇曰。古者王后織玄紵。公侯夫人絃紵。卿之

各衣其夫。○陸氏佃曰。夫禮。后織玄紵。今乃親葛事。如此者。親蠶以勸女功之正事。親葛以勸女功之餘事。○陳氏鵬飛曰。以為衣服。而服之。無厭斃之心。女功之勤。身親嘗之。所以能儉。○陳氏傅良曰。知稼穡之勤者。飲

食則念農功。知絲麻之勤者。衣服則思女功。親執其勞。所以心誠愛而不忍棄也。○嚴氏祭曰。婦人驕侈之情。何有紀極。苟萌一厭心。雖窮極靡麗。耳目日新。猶以為不足也。味服之無數一語。可見后妃之德性。○朱氏善曰。刈而後獲。獲而後績。績而後成布。成布而後為衣。其為之也。有序。其服之也。不厭。此所以為勤且儉也。

○言告師氏。言是言歸。薄汚我私。薄澣我

衣。害反澣反害否反歸寧父母反莫後

集傳賦也。言辭也。劉氏瑾曰。如言采言念薄。言駕言之類。皆語辭也。師女師也。

毛氏萇曰。古者女師。教以婦德。婦言。婦容。婦功。祖廟未毀。教於公宮。三月。祖廟既毀。教於宗室。○孔氏穎達曰。女師。教女之師。婦人五十無子。出而不復嫁。能以婦道教人者。若今時乳母矣。女已出嫁。母尚隨之。薄猶

少也。汚。煩。擗。之以去其汚。猶治亂而曰亂也。陸氏

曰。煩。擗。猶撻也。撻。音那。後。○王氏安石曰。治汚曰汚。澣則濯之而已。私。燕服也。

衣。禮服也。見於宗廟。進見於君子。其餘則私也。○孔氏

穎達曰。六服。禕衣。從王祭先王。禴翟祭先公。闕翟祭羣

小祀。鞠衣。以告桑。展衣。以禮見王及賓客。祿衣。以御於

王。六服皆為公衣。其餘則為私也。三狄之服。刻繒為形。而畫以五色。所以得澣者。言公服有澣者耳。不必六服

皆澣也。三狄不可澣。鞠展祿純色之衣。得澣之也。○劉氏瑾曰。周禮。王后禮有六服。文王未嘗稱王。則大妣亦

未必備此六服。但。害。何也。寧。安也。謂問安也。孔氏穎達

況言禮服而已。人及王后之法。父母在。得歸寧。父母既沒。則使卿寧於兄弟。不得歸寧也。○上章既成絺綌

之服矣。此章遂告其師氏。使告於君子。以將歸寧之意。且曰。盍治其私服之污。而澣其禮服之衣乎。何者當澣。而何者可以未澣乎。我將服之以歸寧於父母矣。

集說

范氏處義曰。其燕服則汚治之。其禮服則澣洗之。初非好潔其衣服。故又問何者當澣。何者未澣。惟其宜稱。○王氏質曰。歸寧告女師。女師告君。所歷不可越也。○輔氏廣曰。薄汚薄澣者。不為甚飾之辭。害澣害否者。又見其不苟之意。○嚴氏粲曰。此章乃說后妃將歸寧之事。舉動必告於師氏。澣衣猶為之斟酌。觀此氣象。其賢可見。○朱氏善曰。師氏導我者也。則必每事而詢訪。見其不敢專也。父母生我者也。則必及時而問安。見其不敢忘也。君子。宗主我者也。則必及及時而問安。則必因師以致告。見其不敢褻也。

總論

王氏質曰。處貴適谷采葛。隨時變趣。婦功其勤苦如此。人情歸寧當有所整飾。乃簡樸如此。可想見古風也。○許氏謙曰。此詩蓋后妃已成絺綌之服。將歸寧而追賦之也。春葛方盛。未刈獲之時。后妃已念念於此。黃鳥飛集。和鳴於叢木之上。於以見和氣薰蒸。物各得所之意。及葛之成也。卽刈之獲之。以為絺綌。既成服而服之。可見勤於女事。不失其時。及將歸寧。則必謀之。姆師告之。夫君至於澣濯微事。亦且咨詢而不置。其勤儉恭敬之德。備見於詞氣之間。則文王刑于寡妻之效。尤著於此矣。

案序云。后妃之本。毛鄭諸家皆以為后妃在父母家。志在女功。其解歸寧父母句。曰。父母在。則有時歸寧耳。朱子則謂此詩是治葛成而歸寧時之作。以既為后妃。貴而勤儉。乃見其德之厚。其義較舊說為長。又案載於禮經者。止后夫人躬桑之文。觀此詩。則知凡百婦功。無不躬親。所以女教修明。而足以化下也。古者夫婦之禮甚

謹婦之於夫。夫之於婦。有不自言而使人將命者。所以嚴內外而禁狎暱也。妻將娠。夫出居側室。使人日再問之。女子歸寧。使師氏告於君子。閨門之內。儼若嚴賓。所為起教於微渺者。其意深矣。

葛覃三章章六句

集傳

此詩后妃所自作。故無贊美之辭。然於此可

以見其已貴而能勤。已富而能儉。已長而敬不弛

於師傅。已嫁而孝不衰於父母。是皆德之厚而人

所難也。小序以為后妃之本。庶幾近之。

呂氏祖謙曰。關雎。后

妃之德也。而所以成德者。必有本也。曷謂本。葛覃所陳是也。

集說

張氏栻曰。后妃之貴。亦必立師傅以訓之。法家拂士。不可一日無。后妃亦然也。周自后稷以農為務。歷世相傳。其君子則重稼穡之事。其室家則重織紵之勤。相與服習其艱難。詠歌其勞苦。此實王業之根本也。故誦服之無斁之章。則知周之所以興。誦休其蠶織之章。則知周之所以衰。○輔氏廣曰。勤儉孝敬。固婦人之懿德。又能不以勢之貴富。時之久遠。而有所變遷焉。則尤見其德厚有常。而人所難及也。○朱氏善曰。即為絺為綌。而知其能勤。即澣濯無斁。而知其能儉。因其言告師氏。而知其能敬。因其歸寧父母。而知其能孝。關雎之所謂淑。指其德之全體言也。此所謂勤儉孝敬。又各就其一事言也。

采采卷耳。不盈頃筐。嗟我懷人。寘彼周行。

上聲。音。周南。

叶戶郎反

集傳 賦也。采采，非一采也。卷耳，泉音洗耳。葉如鼠耳，叢生

如盤。毛氏萇曰：苓耳也。陸氏璣曰：葉青白色，似胡葵。白花細莖，蔓生，可煮為茹。四月中生子，如婦人耳。

中璫，或謂之耳璫。幽州人謂之爵耳。郭氏璞曰：亦名胡泉。江東呼常泉。朱子曰：據本草，即今蒼耳。

欵也。筐，竹器。毛氏萇曰：頃筐，畚屬。懷思也。人蓋謂文王也。姚氏舜牧曰：后妃當采卷耳時，懷望文王之歸，終莫能釋。

大東，皆道路之道。○后妃以君子不在而思念之，故賦鹿鳴，乃道義之道。○**寘舍也。周行，大道也。**朱子曰：詩有三周行，此及

此詩託言方采卷耳，未滿頃筐。鄭氏康成曰：器之易盈而不盈者，憂思深也。

而心適念其君子，故不能復采，而寘之大道之旁也。問卷

耳與前篇葛覃，同是賦體，又似略不同。蓋葛覃直敘其所嘗經歷之事，卷耳則是託言也。朱子曰：設使不曾經歷，而自言我之所懷者，如此，則亦是賦體也。

集說 朱氏善曰：卷耳，易采也。頃筐，易盈也。然采之又采，而不盈頃筐，何也？蓋託言其心在乎君子，而不在乎物也。於是舍之而寘彼大路之旁焉。其心之專一，而不暇乎他，可知也。此詩是后妃之於君子，思之切，憂之深，望之至，有懇切至到之意，而無悲愁愴慘之懷，所以得性情之正也。○凌氏濛初曰：不是已采物，方嗟懷人，總為懷人在念，則采物都無興趣耳。意在言外。

附錄 左傳：嗟我懷人，寘彼周行。能官人也。○毛氏萇曰：憂者之興也。寘，置行，列也。思君子，官賢人，置周之

列位。○杜氏預曰。周徧也。詩人嗟歎言我思得賢人。實之徧於列位。是后妃之志。以官人為急。○歐陽氏修曰。后妃因采卷耳之不盈。而知求賢之難得。因物託意。諷其君子。

○陟彼崔嵬。我馬虺隤。我姑酌

彼金罍。維以不永懷。叶胡隈反

集傳 賦也。陟升也。崔嵬土山之戴石者。虺隤馬罷。音不

能升高之病。許氏慎曰。輔氏廣曰。維以欲其也。隤下墜也。姑且也。曰且曰欲其亦可見託

言之罍酒器。刻為雲雷之象。以黃金飾之。陸氏德明曰。罍其形似壺

容一斛。○孔氏穎達曰。謂之罍者。取象雲雷。言刻畫則用木矣。永長也。○此又託言欲

登此崔嵬之山。以望所懷之人。而往從之。則馬罷病而不能進。於是且酌金罍之酒。而欲其不至於長以為念也。

集說 徐氏常吉曰。登高飲酒。不過摹寫其思而不遂之情。○凌氏濛初曰。亦不是。因登高不得。方思酌酒。

總為懷人在念。則登高飲酒都無趣耳。

附錄 鄭氏康成曰。我。我使臣也。臣以役事行出。離其列位。身勤勞於山險。而馬又病。君子宜知其然。○我。

我君也。臣出使功成而反。君當設饗燕之禮。與之飲酒以勞之。我是以不復長憂思也。

○陟彼高岡。我馬玄黃。我姑酌彼兕觥。徐履反。古橫

古黃 反 維以不永傷。

集傳 賦也。山脊曰岡。玄黃，玄馬而黃，病極而變色也。兕，野牛，一角，青色，重千斤。觥，爵也。韓氏嬰曰：觥容五升。以兕角為爵也。

集說 毛氏萇曰：傷，思也。○鄭氏康成曰：此章為意不盡。申殷勤也。觥，罰爵也。饗燕所以有之者，禮自立。司正之後，旅疇必有醉而失禮者，罰之亦所以為樂。○朱子曰：周禮有觥罰之事，又云觥其不敬者，但謂以觥罰之耳，非必觥專為罰爵也。

○陟彼砠矣。我馬瘠矣。我僕痡矣。云

何吁矣。

集傳 賦也。石山戴土曰砠。孔氏穎達曰：爾雅釋山云：石戴土謂之崔嵬。土戴石為砠。二傳相反。或傳寫誤也。○劉氏瑾曰：今集傳從毛氏而不從爾雅者，豈以其書後出也歟。瘠，馬病不能進也。痡，人病不能行也。吁，憂歎也。爾雅注引此作盱。張目望遠也。詳見何人斯篇。

集說 輔氏廣曰：馬病不能進，猶可資於人也。僕病不能行，則斷不能往矣。此亦甚之之詞。至於云何吁矣，則憂之極，惟有愁歎而已。非酒可得而解也。○嚴氏粲曰：僕馬皆病，而今云何乎。長歎而已。○何氏楷曰：始而懷，既而傷，終而吁，其念愈深，則其憂苦矣。

總論

黃氏佐曰。詩序云。后妃之志。志者。心之所之也。此詩以志為主。俱是託言。○錢氏天錫曰。通章都非實事。思之變境也。一室之中。無端采物。忽焉登高。忽焉飲酒。忽焉馬病。僕痛。繚繞紛紜。卒之念息而歎曰。云何吁矣。可見懷人之思自真。而念之所設。皆假。安得以不思哉。所謂詩之正也。

附錄

孔氏穎達曰。作卷耳詩者。言后妃之志也。后妃輔佐君子。欲令君子求賢德之人。審置於官位。復知臣下出使之勞。欲令君子賞勞之內。有進賢人之心。至於憂思而成勤。此是后妃之志也。○歐陽氏修曰。婦人無外事。求賢審官。非后妃之職。蓋后妃諷其君子愛養臣下。慰其勞苦。而接以恩義。其宮中相語者。如是而已。非私謁之言也。○劉氏敞曰。此詩言后妃警戒人君。使求賢審官之意耳。不謂后妃已自求賢審官也。○朱子曰。一章言后妃志於求賢審官。又知臣下之勤勞。故采卷耳。備酒漿。雖后妃之職。然及其有懷也。則不盈頃筐。

而棄置之於周行之道矣。言其憂之切也。二章三章。皆臣下勤勞之甚。思欲酌酒以自解之辭。凡言我者。皆臣下自我也。此則述其所憂。又見不得不汲汲於采卷耳也。四章甚言臣下之勤勞也。○此詩之序。以為后妃當輔佐君子。求賢審官。知臣下之勤勞。朝夕思念。至於憂勤。而歸本於后妃之志如此。其說始於左氏。自漢唐宋諸儒。及朱子舊說。俱從之。至撰集傳。則斷以為后妃懷文王。以婦人不預外事也。其論固正。然詩人特詠其情如此耳。非果預外事也。理亦可通。

卷耳四章章四句

集傳

此亦后妃所自作。可以見其貞靜專一之至

矣。豈當文王朝會征伐之時。羑里拘幽之日而作

歟。然不可考矣。

集說

輔氏廣曰。先生又嘗曰。此詩後三章。只是承首章之意。欲登高望遠而往從之。則僕馬皆病而不得往。故欲酌酒以自解其憂傷耳。大意與草蟲詩相似。○劉氏瑾曰。后妃託言方采卷耳而適思君子。則遂不能復采。欲望君子而僕馬不前。則且飲酒解憂。可見其心之貞靜而不動於邪。情之專一而不失其常矣。至其自言不永懷傷者。又合所謂哀而不傷之意。乃其情性之正。發見於一端者。參之關雎首章樂而不淫。則又可備見其情性全體也。又案羨里。先儒以其地在相州鄴都。因羨水得名。昔紂信崇侯虎之譖。囚文王於此。文王因作拘幽操。

南有樛

木

葛藟

之樂

只

反

居

力

音

之氏

君子。福履綏之。

集傳

興也。南。南山也。木下曲曰樛。藟。葛類。

陸氏璣曰。藟一名巨苾。似

燕萹。亦延蔓生。○孔氏穎達曰。藟與葛異。亦葛之類也。

纍猶繫也。

陸氏德明曰。只。纍。纏繞也。

語助辭。君子。自衆妾而指后妃。猶言小君內子也。

朱子曰。夫

人稱小君。大夫妻稱內子。妾謂嫡曰女君。則后妃有君子之德。固可以君子目之。○問君子作后妃。亦無害否。曰。以文義推之。不得不作后妃。若作文王。恐太隔越了。履。祿。綏。安也。嚴氏粲曰。動。履。○后妃能逮下而無嫉妒之心。故衆妾樂其德而稱願之。曰。南有樛木。則葛藟纍之矣。樂只君子。則福履綏

之矣。

集說

楊氏時曰。婦人無嫉妒之行。容有勉而至者。無嫉妒之心。則性之也。故以樛木況之。樛與性俱生。非矯揉而然。○李氏樗曰。詩序言能逮下。逮與呂刑羣后之逮在下同。后妃能逮下。衆妾得進御於君。以成肅雝之治。福祿所以綏之也。○王氏質曰。木曲易引蔓。人卑易引福。○輔氏廣曰。此詩雖是與體。然亦兼比意。與關雎同。故鄭氏以爲木枝以下垂之故。葛藟得纒而蔓之。喻后妃能以惠下逮衆妾。故衆妾得上而事之也。○**案**鄭箋云。樂其君子。猶樂是君子。孔疏云。所以樂得君子者。以內和而家治。則天下化之。四方感德。樂事文王。而此爲福祿所安也。歐陽修曰。后妃不嫉妒。下其意以和衆妾。衆妾得附之。而竝進君子。云樂只君子者。衆妾愛樂其君子之辭也。蘇轍呂祖謙嚴粲輩亦皆宗其說。以爲君子指文王。獨朱子以君子指后妃爲切實。而引

小君內子之文爲證。蓋體貼詩之本文以說詩。故其義爲優爾。

○南有樛木。葛藟荒之。樂只君子。福履將之。

集傳

興也。荒。奄。

反。衣檢也。

呂氏祖謙曰。荒。芘覆也。○黃氏

芘。覆也。

將。猶扶助也。

孔氏穎達曰。福履將之。毛以爲福祿所大。鄭以爲福祿之所扶助。○鄒氏

泉曰。掩庇之徧爲荒。將者。思若或啓之。而使開發。行若或翼之。而使順適。

集說

汪氏應蛟曰。人之所樂。天之所助也。

○南有樛木。葛藟荒之。樂只君子。福履成

之。

金定言卷之四

集傳興也。縈旋成就也。鄒氏泉曰。旋繞之周為縈。成者言諸福之物。可致之祥。莫不畢

至。有純全悠久之意。顧氏起元曰。成言自始至終。自大至小。其福無不成就。

總論輔氏廣曰。三章皆有淺深。其美也無夸辭。其禱也無侈說。此又可見衆妾性情之正也。徐氏光啓

曰。天保定爾。亦孔之固。綏也。自天祐之。吉無不利。將也。綏以多福。俾緝熙于純嘏。成也。顧氏夢麟曰。三章大

旨。以稱願不已為義。黃才伯謂稱者。稱其所已然。德也。願者。願其所未然。福也。

樛木三章章四句

集說黃氏樞曰。此文王雖離在宮時也。中庸曰。無憂者其惟文王乎。中庸形容其父子之美。而

此詩形容其閨門之美。中庸言其無憂。而此詩言其和樂。吁。此文王所以聖歟。鄧氏元錫曰。樛木

關雎之報也。后妃逮下無妒忌之心。和平極矣。天地和而萬物生。至和召祥。福履綏將且成焉。蠡斯得無應乎。宜繩蟄矣。

蠡斯羽。詵詵。今宜爾子孫振振。

集傳比也。蠡斯。蝗屬。長而青。長角長股。能以股相切作

聲。一生九十九子。毛氏萇曰。蠡斯。蚣蟻也。孔氏穎達曰。此言蠡斯。七月云斯蠡。文雖顛倒。

其實一也。陸璣疏云。幽州人謂之春箕。朱子曰。詩中有以斯為語辭者。如鹿斯露斯之類。然七月詩乃云斯蠡動股。則恐蠡斯是名也。詵詵。和集貌。爾。指蠡斯也。振振。盛貌。比

者。以彼物比此物也。后妃不妒忌。而子孫眾多。故衆妾

次定言卷之四 周南

以螽斯之羣處和集。而子孫衆多比之。言其有是德。而宜有是福也。後凡言比者。放此。朱子曰。子孫振振。是說螽斯之子孫。不是說后妃之子孫。蓋比詩多不說破這意。然亦有說破者。此前數篇賦比興皆已備矣。

集說

孔氏穎達曰。以螽斯之多。喻后妃之子。言羽者。螽斯羽蟲。故舉羽以言多也。○不妒忌。則嬪妾俱進。所生亦后妃之子。故得衆多也。○言孫者。協句。且孫則子所生。生子衆。則孫亦多矣。○鄭氏伯熊曰。婦人之德。莫大於不妒忌。蓋功容可勉。而根於情者。難自克也。○張氏栻曰。螽斯蝗蟲之類耳。而乃取之以喻后妃。疑若不倫。是不然。詩人亦取其合於德如何耳。如雉鳩亦取其德之合也。左傳韓簡曰。物生而後有象。象而後有滋。滋而後有數。陰陽和氣。盈天地間。而萬物生焉。螽斯形之微。僅寸餘耳。而其滋數之多。凡物皆不能及其子之

類聚者。大小不一。與他彙不亂。亦不相軋。且有大字小。小依大之狀焉。是雖微蟲。實鍾大和之氣。以成形。以之擬后妃之德。誰謂不倫也哉。○嚴氏粲曰。螽蝗生子最多。信宿則羣飛。因飛而見其多。故以羽言之。喻子孫之衆多。歸其自於后妃也。此詩之意。全在宜爾二字。風人意在言外。見后妃子孫衆多。但言宜其如此。使人自思其所以宜者何故。而不明言之。謂由不妒忌而致也。○朱氏道行曰。說螽斯。就是說后妃。重說說字。物羣則爭。羣集而和。乃是真和。和者生理。亦是生氣。以是宜爾子孫。

○螽斯羽。薨薨兮。宜爾子孫繩繩兮。

集傳

比也。薨薨。羣飛聲。毛氏萇曰。薨薨。衆多也。○王

繩不絕貌。

○螽斯羽。揖揖會聚也。今宜爾子孫。螻螻亦多意。今。

集傳 比也。揖揖會聚也。王氏安石曰。揖言其聚之衆。螻螻亦多意。方

應龍曰。振與繩。易明。蟄。即蟄蟲之蟄。伏藏盤聚意。

總論 呂氏大臨曰。螽斯將化。其羽比次而起。已化而齊。飛有聲。既飛。復斂羽而聚。歷言衆多之狀。其變如此也。

陸氏深曰。螽斯之詩。與樛木三章。皆后妃之德也。詞氣和平。文義回互。反覆而吟詠之。則深淳醲郁之化。自溢於音響節奏之餘。以聲詩言之。三疊之類也。以聲樂言之。三闕之類也。而古調從可識矣。○郝氏敬曰。於螽斯詠其羣。不言和。而其和可知。於后妃詠其子孫。多。不言羣。而其羣可知。不直稱君子。而借螽斯感歎。微婉深厚。悠然可想。朱子謂爲比。是也。○胡氏紹曾曰。此詩美周家一宮雍穆耳。詩人反覆一螽。而卜世卜年。皆

此。系於

螽斯三章章四句

集說 朱子曰。不妒忌。是后妃之一節。關雎所論。却

則由不妒忌而已。故繼樛木之後。○黃氏樞曰。詩人以螽斯比后妃。取其子孫衆多也。作詩序者。旣曰言若螽斯。又曰不妒忌。則子孫衆多。言若云者。繼上文之辭。不妒忌者。乃其推本之論。蓋子孫衆多者。人君之福。而不妒忌者。婦人所難也。漢明德皇后。嘗以皇嗣未廣。薦達左右。後宮有進幸者。多加慰納。宗社以隆。故嘗謂犬妣不妒忌。而周以興。思齊言犬妣嗣徽音。則百斯男。此詩言不妒忌。則子孫衆多。皆是一意。○劉氏瑾曰。管蔡世家云。武王同母兄弟十人。長伯邑考。次武王發。次管叔鮮。

金定言... 卷一

次周公旦。次蔡叔度。次曹叔振鐸。次成叔武。次霍叔處。次康叔封。次聃季載。此其多子之驗。誠后妃之德所致也。○朱氏善曰。膠木。后妃不妒忌。而衆妾有祝願之誠。蠶斯。后妃不妒忌。而衆妾有祝願之誠。蓋正家之道。始於閨門。尊卑貴賤之分。雖不可以不嚴。然必上無嫉妒之心。則下無怨恨之意。和氣充溢。瑞慶流行。福履之綏。子孫之衆。自有不期而然者矣。

桃之夭夭。灼灼其華。之子于歸。宜其室家。

室家。古胡古牙二反。

集傳興也。桃木名。華紅。實可食。天天。少好之貌。灼灼。華

之盛也。嚴氏粲曰。灼。木少則華盛。孔氏穎達曰。天天。言桃之少。灼灼。言華之

盛。桃或少而未華。或華而不少。此詩天天灼灼。並言之。則是少而有華者。故辨之。言桃有華之盛者。由桃少故華盛。以喻女少而色盛也。○徐氏常吉曰。桃之為木。多華。然五年則老。老則華減。故以木少華盛為言。之

子。是子也。此指嫁者而言也。婦人謂嫁曰歸。何氏休曰。婦人生以

父母為家。嫁以夫為家。故謂嫁曰歸。周禮仲春。令會男女。鄭氏康成曰。陰

順天。然則桃之有華。正昏姻之時也。蔡氏卞曰。桃先百

時也。然則春而陽中也。故以紀昏姻之時正。宜者和順之意。室。謂夫婦所居家。

謂一門之內。毛氏萇曰。于。往也。宜。以有室家無踰時者。

王氏志長曰。宜其室家。則室家皆得其宜。○文王之化。

也。左傳曰。男有室。女有家。室家。謂夫婦也。○文王之化。周南

自家而國。男女以正。昏姻以時。故詩人因所見以起興。而歎其女子之賢。知其必有以宜其室家也。

集說

孔氏穎達曰。傳以桃之天天。言其少壯。宜其室家。為不踰時。則上句言其年盛。下句言嫁娶得時也。○張氏栻曰。此言興也。然興之中有比焉。惟比意輕於興。則謂之興而已。詩中若此者蓋多也。○輔氏廣曰。仲春之月。天地之氣既如此。其融和而草木之花。又如此。其禮盛。先王於此時。而令會男女以成昏姻。宜矣。文王之化始於家。故天下亦先有此應。婦人之賢。莫大於宜家。使一家之人。相與和順。而無一毫乖戾之心。始可謂之宜矣。○朱氏公遷曰。木少則華盛。女賢則家和。亦有相因之義。○黃氏佐曰。宜室。是必敬必戒。無違夫子。宜家。是克孝克慈。不違老幼。皆閑於婦道也。因其往嫁之賢。知其已嫁之善。夫婦相與。必有和樂而恭敬存焉。非

被文王之化。其能然乎。○徐氏光啓曰。詩人所見者。嫁以時耳。何以遽知其賢。蓋被化之深。風俗素美。閨門素飭。可望而知其為宜家之婦矣。

○桃之天天有實。其實之子于歸。宜其家室。

集傳

興也。蕡實之盛也。毛氏萇曰。蕡實貌。非但有華色。又有婦德。○羅氏願曰。麻實謂之蕡。麻於植物中最多子。實之多。興其德之厚。○朱氏道行曰。凡華艷者鮮實。桃天不然。春開夏結。其實多而味美。故曰有蕡其實。彼家室猶室家也。于歸者之有子似之。

○桃之天天其葉蓁蓁。之子于歸。宜其家。

人。

集傳興也。蓁蓁葉之盛也。毛氏萇曰：蓁蓁至盛貌。家人有色有德，形體至盛也。家人

一家之人也。毛氏萇曰：一家之人，盡以為宜。○鄭氏康成曰：家人，猶室家也。○朱子曰：室家，家室。

家人變文以叶韻耳。

總論張氏栻曰：乖爭之風，始於閨門。至使萬物不得其所，而況昏姻之能以時乎？此意蓋深遠矣。○呂氏

祖謙曰：灼灼其華，因時物以發興也。既詠其華，又詠其實，又詠其葉，非有他義。蓋反覆歌詠之耳。○黃氏樞曰：之子于歸，宜其室家。又曰：宜其家人。此

則形容其男女以正之義也。如不待父母之命，媒妁之言，則非所謂宜也。大學云：宜其家人，而後可以教國人。

則知宜之一字，亦見男女以正之意。○許氏謙曰：詩人

見親迎者而作此詩，自華而有實。又見其葉之盛，蓋自仲春至於春暮，非一時也，而皆曰之子于歸，所見非一女矣。宜其家之德，則同也。可見文王之化，行於近遠，女子皆有德之人，則於其室家，又胥教訓，風俗安得不厚乎。

附錄孔氏穎達曰：作桃夭詩者，后妃之所致也。男女以正，昏姻以時，周南之國，無鰥獨之民焉。此雖文王

化使之然，亦由后妃內贊之致，故因上螽斯，后妃不妒忌，後言其所致也。且言致從家至國，亦自近致遠之辭也。○王氏安石曰：后妃處乎重闈深密之地，而四方之

廣，家人婦子服化者，正其本而已。○朱氏善曰：之子之所謂宜，猶后妃之所謂淑，然淑以其德之蘊於中者言，

宜以其效之著於外者言，惟其有是德，故可必其有是效也。宜者和順之意，和則不乖，順則無逆，此非勉強所

能也。必孝不衰於舅姑，敬不違於夫子，慈不遺於卑幼。

義不拂於夫之兄弟。而後可以謂之宜也。然由后妃教化倡於上。之子則倣應於下。故于歸之際。見者知其必可以觀感應之機矣。
案文王之聖治。莫先於正家。后妃之淑德。莫盛於不妒忌。由宮闈而達於閭閻。風化之美。有不知致而致之者。詩序主於后妃。朱傳主於文王。意各專重。而道實相成也。

桃夭三章章四句

集說 陸氏深曰。桃夭之善。善時也。大抵女子之失身。由於失時。一失其身。則淫蕩猜貳之情。有終其身而不自宜者矣。況能宜其室家乎。后妃內助文王。以成齊家治國之化。既無強暴侵凌。以奪其守。又無凶荒札厲。以奪其時。雖中人之性。皆可跂及於善道也。故因桃夭起興。而所感者深矣。○

馮氏復京曰。案朱傳宗鄭義。以桃夭為昏姻之候。今人多用其說。不知毛鄭二義。合之則兩得。離之則兩偏也。為毛說者。以秋冬為期。孔子家語云。霜降而婦功成。嫁娶者行焉。冰泮而農桑起。昏禮殺於此。孫卿韓嬰皆曰。霜降逆女。冰泮殺止。為鄭說者。以二月為期。夏小正曰。二月綏多女士。綏。安也。冠子取婦之時也。月令仲春祀郊禴。蓋玄鳥生乳之月。以為嫁娶之候。天子重之而祀焉。白虎通曰。嫁娶以春。何也。春。天地始通。陰陽交接之時也。凡此諸書。皆二家證據。未易評定得失。然鄭本據媒氏之文。愚請即以周禮正之。媒氏云。仲春令會男女。奔者不禁。司男女之無夫家者而會之。蓋時至仲春。則農桑已起。昏期過晚。故不禁奔者。或無夫家。則司而會之。若正為昏姻之時。而復不禁奔。豈禮也哉。據荀卿云。霜降逆女。冰泮殺止。其意謂九月至二月。皆可昏也。此近得其實矣。

肅肅兔置

子斜反又子余反與夫叶

椽之丁丁

陟耕反

赴赴武夫

公侯干城

集傳

興也。肅肅，整飭貌。

毛氏萇曰：肅肅，敬也。○焦氏延壽曰：兔置之容，不失其恭。○歐

陽氏修曰：肅肅，嚴整貌。○輔

氏廣曰：肅肅，亦有嚴敬之意。

置，罟也。爾雅：兔罟謂之置。李氏巡注：兔自作

徑路。張置

丁丁，椽杙聲也。

爾雅：檝謂之杙。李氏巡注：杙謂檝也。○許氏慎曰：擊檝於

地中。張置其上也。○孔氏穎達曰：此丁丁連椽

之故。知椽杙聲。故伐木傳亦云：丁丁，伐木聲。

赴赴，武

貌。輔氏廣曰：赴赴，是

干盾也。干城，皆所以扞外而衛內

者。

毛氏萇曰：干，扞也。○孔氏穎達曰：扞蔽如盾，防守如城。

○化行俗美，賢才衆多。

雖置兔之野人，而其才之可用猶如此。故詩人因其所

事以起興而美之，而文王德化之盛因可見矣。

問兔置詩作賦

看得否。朱子曰：亦可。但其辭上下相應，恐當爲興。然亦是興之賦也。

集說

鄭氏康成曰：置，兔之人。鄙賤之事，猶能恭敬，則是

賢者也。有武力可任爲將帥之德，諸侯可任以國守。扞

城其民，折衝禦難於未然。○范氏處義曰：干城，言扞衛

公侯。所謂隱若長城是也。詩人偶見施兔置者，肅肅然

嚴整，椽杙之聲。丁丁然可聞，則非遠人之地。因是知其

人赴赴然勇而難犯，移此心爲公侯之扞衛，有何不可。公侯猶言國君。○朱子曰：聞檝杙之聲，而視其人甚勇，可爲干城者也。田野之人，皆有可用之才，足以見賢才衆多矣。此詩極其尊稱，不過曰公侯而已。亦文王未嘗

稱王之一驗也。凡雅頌稱王者，皆追王後所作耳。○瞻欲大而心欲小，戰戰兢兢，如臨深淵，方能為赴赴武夫。公侯干城之事。○黃氏樞曰：武夫以勇力自恃，風化所難至也。今兔置之人，亦有至誠恭敬之心，愛民忠君之德，以見風化之所及，人者深耳。○嚴氏粲曰：可為公侯之干城，言勇而忠也。○唐氏汝諤曰：干城非止以用武言，以彼其才，即今可為公侯之保障，非擬他日為公侯之用也。○陸氏化熙曰：赴赴不必謂是椎魯少文。

○**肅肅兔置，施于中逵。赴赴武夫，公侯好仇。**渠叶

反之

集傳 興也。逵，九達之道。爾雅：九達謂之逵。郭氏璞注：四道交出，復有旁通者。○劉氏瑾

曰：中逵謂九達之道中也。仇與逵同。匡衡引關雎亦作仇字。公侯善

匹猶曰聖人之耦，則非特干城而已。歎美之無已也。下章放此。

集說 孔氏穎達曰：毛以為赴赴然有威武之夫，有文有武，能匹耦於公侯之志，為公侯之好匹。○范氏處

義曰：好仇為公侯之善耦，是也。詩人偶見施兔置者，於山間之道，稍遠人跡，而肅肅然嚴整，與初無異。因是知其入赴赴然勇而有守，移此心為公侯之仇耦，有何不可。○朱子曰：好仇是善匹，言其才德相合處。○嚴氏粲曰：可謂公侯之善匹，言勇而良也。○鄒氏泉曰：九達兔置所往來之地，故設置於此，好仇即元首明，股肱良，有是君，有是臣之謂，所謂聖人有作，此其為聖人之耦，有王者起，此其為王者之佐是也。

○**肅肅兔置，施于中林。赴赴武夫，公侯腹心。**

集傳興也。中林，林中。爾雅：野外謂之林。○許氏：腹心同。

心同德之謂，則又非特好仇而已也。

集說孔氏穎達曰：臣之倚用如已腹心。○王氏安石曰：中林，人莫之聞見也。欲觀好德之實，其在於處隱。

乎。○范氏處義曰：腹心，言公侯之謀臣，所謂作朕心膂是也。詩人偶見施兔置者於中林幽深之處，而肅肅然嚴整，不以人所不聞不見而少懈，由是知其赴赴然勇而不欺，移此心以為公侯之腹心，有何不可。○朱子曰：注云同心同德，是言其才德與已無異。○嚴氏粲曰：謂機密之事，可與之謀慮，言勇而智也。○季氏本曰：以守禦武夫，而其德猶如是，見周南之世，賢者在位，能者在職，而所為才者皆本於德也。豈專以勇力為武者哉。○歐陽氏修曰：捕兔之人，布其網罟於道路，林木之下，肅肅然嚴整，使兔不能越逸，以興周南之君，列

總論

其武夫為國守禦，赴赴然勇力，使奸民不得竊發，而此武夫者，外可以扞城其民，內可以為公侯好匹，其忠信又可倚以為腹心，以見周南之君好德樂善，得賢衆多，所任守禦之夫，猶如此也。○蘇氏轍曰：丁丁，人所聞也。中達人所見也。中林，聞見所不及也。而猶肅肅焉，則敬其事也至矣。○張氏拭曰：和平之風，致使兔置之人亦與其好德之藝性，則固有不信而疾而速者，其要在於修身以齊家而已。○呂氏祖謙曰：曰干城，曰好仇，曰腹心，其詞浸重，亦歎美無已之意也。○胡氏紹曾曰：此詩人深知公侯，又即武夫而直觀其表裏，看此氣象，真是天地開，賢人出，且當時才力大略可見。西伯武功亦有可想。○宋古者文武同揆，兵民合一，所以推干戈以屬人，而無意外之慮也。六官之長，即六軍之將，鄉遂之民，即卒伍之士，降至春秋之世，霸國之用其民也，猶曰民未知義，未安其教，民未知禮，未生其共，故衆心成城，緩急足恃。

文王教化之行。至於兔罝之野人。而足為好仇。足為腹心。所以以戰則克。以綏則威。而無敵於天下也。

兔罝三章章四句

集說

范氏處義曰。二南為風化之首。所謂化者。謂變易其心思。矯揉其氣習。暴者仁。薄者厚。愚者靈。而惑者解。其感發之機。與天地同其妙。詩人多取人之難化者言之。以明二南風化之效。兔罝其一也。○輔氏廣曰。文王之時。固多賢者。此特言武夫者。見其無所不備也。且文王於武事尚矣。觀此及棫樸所謂六師及之者。亦可見當時俗尚之萬一。夫三分天下有其二。雖是德化之盛。而天下歸之。然遏密侵阮。伐崇戡黎之役。其於武事。大略可觀矣。○朱氏善曰。以武夫而才可以為干城。德可以為好仇。為腹心。是何人才之盛哉。蓋幸而遇聖人之世。又幸而生聖人之國。則其涵濡聖人之

化。固宜其成就之若此也。棫樸之詠。文王曰。豈弟君子。遐不作人。旱麓之詠。文王曰。周王壽考。遐不作人。是人才之作興。固本之文王之德。尤本之文王之壽也。有文王之德。故其造就之也速。有文王之壽。故其涵養之也深。雖以兔罝之野人。而其才德之美若此。則其在官使者。從可知矣。

附錄

金氏履祥曰。案墨子書。文王舉閔天泰顛於罝網之中。授之政。西土服。此與兔罝之詩。辭意脗合。計此詩必為此事而作也。夫肅肅敬也。赴赴約也。罝兔而體貌有肅敬之容。武夫而步伐有約束之度。此閔天泰顛之所以為賢。而文王所以取之也。閔天泰顛為文王奔走。疏附禦侮之友。後為武王將威劉敵之人。信哉其為公侯之干城。好仇腹心者歟。

采采芣苢

音浮音苢

薄言采之

采采芣苢

薄言采之

采采芣苢

薄言采之

采采芣苢

薄言采之

有叶羽之。

集傳 賦也。芣苢。車前也。大葉長穗。好生道旁。

爾雅。芣苢。馬舄。馬舄。

車前。○韓氏嬰曰。直曰車前。瞿曰芣苢。生於兩旁者為

瞿。○陸氏璣曰。車前一名當道。喜在牛跡中生。故曰車

前當道也。采。始求之也。有。既得之也。毛氏萇曰。采采。非一辭

也。○問傳曰。有。藏也。然

下章曰。掇曰捋曰拈曰撝曰擷。首章乃先言藏。恐非其序。朱

子曰。首章舉始終。後章述次序。詩亦有此例。○輔氏廣

曰。求其所生之處曰采。○化行俗美。家室和平。婦人無

得其所生之處曰有。

事。相與采此芣苢。而賦其事以相樂也。采之未詳何用。

或曰。其子治產難。毛氏萇曰。宜懷妊焉。○陸氏璣曰。藥中車前子是也。幽州人謂之牛舌草。

可驚作茹。大滑。其子治婦人難產。○陸氏佃曰。神仙服食法曰。車前之實。雷之精也。善療孕婦難產。及令人有子。○輔氏廣曰。芣苢。陸璣以為治難產。而先生取之者。蓋以今醫治難產者用其子故也。毛氏以為宜懷妊者。亦只是陸璣之意。非謂其能治人之無子也。



嚴氏粲曰。芣苢宜懷妊。故婦人有子則采之。采采。非一采矣。而又采之。喜樂之深也。有言采而得之。

為已所有也。○黃氏佐曰。首章方去采時事也。蓋以門

庭之內。幸無係累。而機杼之外。尚有餘閒。乃相與采此

芣苢。始焉眩於求也。薄言采之。既而真於遇也。薄言有之。

之。既而真於遇也。薄言有之。

○采采芣苢。薄言掇之。采采芣苢。薄言捋之。

力活之。

都奪反

之。采采芣苢。薄言捋

集傳 賦也。扱。拾也。捋。取其子也。

沈氏守正曰。子之在地者。拾之。未落者。捋之也。

○徐氏鳳彩曰。扱者。芣苢之子在穗。故拾其穗。捋者。芣苢之用在于子。故取其子。

集說

嚴氏粲曰。采而聚之於地。既為已有。於是就地扱拾之。既扱拾之。又捋其子。○黃氏佐曰。此章正是

采芣苢時事也。既求而得之矣。於是穗可拾也。薄言拾其穗。於是子可取也。薄言取其子。扱之。捋之。兼收並蓄。殆取諸物而有餘矣。

○采采芣苢。薄言結音之。采采芣苢。薄言禡戶之。

集傳

賦也。結。以衣貯之而執其衽也。禡。以衣貯之而扱

其衽於帶閒也。

孔氏穎達曰。釋器云。執衽謂之結。孫炎曰。持衣上衽。又云。扱衽謂之禡。李巡曰。

扱衣上衽於帶。○劉氏瑾曰。衽者。衣之襟也。帶者。腰之帶也。

集說

黃氏佐曰。此章既采而攜以歸時事也。采之既多。非掬之所能容。以衣貯之而執其衽於帶閒。禡之。可謂不厭矣。

總論

孔氏穎達曰。天下和平。婦人始樂有子。三章皆樂有子之事也。○此三章頻言采采。見其采者多也。

明非一人而為此六事而已。○楊氏時曰。后妃無嫉妒之心。則和平矣。惟其和平。則天下化而和平。則婦人以有子為樂矣。芣苢。和平之詩也。天下和平。非文辭形容所能及。故每章言采采而已。無他詞也。○黃氏樵曰。和平。說者以為天下和平。迂仲以為不如程氏曰。家室之和平。予以為始於室家之和平。而極於天下之和平。二

說一說也。易曰：感人心而天下和平。后妃不妒忌於閨門之中，而風化及於天下之夫婦，豈非有以感人心而然乎？治世之音安以樂，其政和。尤於此詩而見之。○黃氏震曰：芣苢，諸家皆以為治妊，蓋因詩序樂有子之言也。戴氏謂此詩見一時同輩相與之樂，此語蓋得其氣象。○劉氏瑾曰：自采之至頌之，有無多寡之序如此。○許氏謙曰：朱子之說謂化行俗美，家室和平，蓋教化流行，風俗淳美，夫夫婦婦各得其宜，莫不遂其生生之道，故婦人以有子為樂，而同賦此詩也。○黃氏佐曰：芣苢，微物也，而相與采之，采物細事也，而相與賦之，家室和平之樂，固溢於采物之餘，而廣大自得之風，自暢於行歌之外。成周太和氣象，不亦可想見哉！此亦文王家齊國治之效。○郝氏敬曰：此詩本詠王者化國之日，不言朝野士庶而言婦人，不及織紵女工，而託詠采芣苢詩之所以善於言也。

芣苢三章章四句

集說

王氏肅曰：自關雎至芣苢，房中之樂。○吳氏師道曰：此詩終篇言樂，不出一樂字，讀之自見意思。○陸氏深曰：案此詩凡三章，章四句，四言總之為四十八字，內用采字凡十三，芣苢字凡十二，薄言字凡十二，除為語助者，才餘五字耳，而敘情委曲，從事始終，與夫經行道途，招邀儔侶，以相容與之意，藹然可掬，天下之至文也。即此亦可和而音平。

南有喬木不可休息。漢有游女不可求。

思漢之廣矣不可泳。思江之永矣。

周南

不可方叶甫思妄反

集傳興而比也。上竦無枝曰喬。爾雅曰。小枝上繚為喬。思語辭也。

篇內同。孔氏穎達曰。疑息字作思。詩之大體。韻在辭上。疑休求為韻。二字俱作思。漢水出興

元府。皇興表。今陝西漢中府。嶓冢山至漢陽軍。皇興表。今湖廣漢陽府。大別

山入江。江漢之俗。其女好遊。漢魏以後猶然。如大堤之

曲可見也。劉氏瑾曰。大堤。漢水之堤。大堤曲。宋隨王誕為襄州時作。樂府遺聲。都邑三十四曲。有大

堤。泳潛行也。江水出永康軍。皇興表。今四川成都府灌縣。岷山東流

與漢水合。東北入海。永長也。方桴也。許氏謙曰。漢言廣謂橫渡也。江言永

謂浴○文王之化。自近而遠。先及於江漢之間。而有以

變其淫亂之俗。故其出游之女。人望見之。而知其端莊

靜一。非復前日之可求矣。因以喬木起興。江漢為比。而

反覆詠歎之也。劉氏瑾曰。上四句。以喬木不可休。對游女不可求而言。故屬興。下四句。但言漢

廣不可泳。江永不可方。以比貞女不復可求之意。而不說其所比之事。故屬比。此其興比體製之殊。備見於一章之內。後凡言興與比者。其文意亦皆做此章云。

集說鄭氏康成曰。紂時淫風徧於天下。惟江漢之域。先

受文王之教化。不可者。本有可道也。木以高其枝

葉之故。故人不得就而止息也。興賢女雖出游流水之上。人無欲求犯禮者。亦由貞潔使之然。漢也。江也。其欲

渡之者必有潛行乘泚之道。今以廣長之故，故不可也。又喻女之貞潔，犯禮而往，將不至也。○孔氏穎達曰：此言游女尚不可求，則在室無敢犯禮可知也。出者猶能為貞處者自然尤潔。○內則云：女子居內，深宮固門，閨寺守之，則貴家之女也。庶人之女，則執筐行，盥不得在室。故有出游之事。既言不可求，明人無求者。○程子曰：漢廣言文王之道，南被江漢之域，因取漢水為興，水之為限不可踰也。禮義之為閑不可犯也。南國被文王之化，家齊俗厚，婦人知守禮義，既以禮義為防，則非僻之思自絕，雖有以非禮求之者，亦不可得而犯也。不可得而犯，則不思犯矣。夫人之休於木下，必攀枝跛倚，喬木不可攀及也。故人絕欲休之思，與女有高潔之行，非禮者自無求之之思也。漢之廣不可泳，以濟江之永不可方而渡，興以禮自閑不可侵凌也。女之游者，謂曠僻獨行可動之地，異乎閨門之內，姆傅之側也。○李氏樛曰：此章言漢廣不可泳，江永不可方，作詩者是在江漢合

流之處也。○朱子曰：主意只說漢有游女，不可求，思兩句。餘六句是反覆比興說。如奕奕寢廟，至遇犬獲之。上下六句亦只興出他人有心，予忖度之兩句。○黃氏樛曰：居周南者，因漢水而起興，故作漢廣之詩。自文王而言之，則謂之德，謂之道。自其所及者言之，則謂之化。○嚴氏粲曰：詩人偶見漢上游女，人無凌犯之心，紂之淫風已變，由文王風化所及，故假此游女以起義耳。○男子見游女，自無犯禮之思，後序謂求而不可得，非也。○朱氏善曰：言今日之不可求，則知前日之可求矣。前日之可求，衰世之俗也。今日之不可求，聖人之化也。夫觀聖人之化，不於其他，而必於江漢之游女，何也？曰：天下之治，正家為先，錄一漢廣以見天下之家正也。天下之家正而天下治矣，非被聖人之化而能若是哉。

○翹翹 祈遙 錯薪言刈其楚之子于歸言秣其

馬補反漢之廣矣不可泳思江之永矣不可方思

集傳與而比也。翹翹秀起之貌。錯雜也。楚木名。荆屬。孔

穎達曰。薪木稱。月令云。收秩薪柴。注云。大者可析謂之薪。下章萋草亦言薪者。因此通其文。楚亦木名。王風鄭風。竝云不流。之子指游女也。秣飼也。毛氏萋曰。六。以東楚是也。

錯薪起興而欲秣其馬則悅之至以江漢為比而歎其終不可求則敬之深。

集說鄭氏康成曰。楚雜薪之中尤翹翹者。我欲刈取之。以喻衆女皆貞潔。我又欲取其尤高潔者。之子是

子也。謙不敢斥其適已。于是子之嫁。我願秣其馬。致禮餼示有意焉。○歐陽氏修曰。願秣其馬。此悅慕之詞。猶古人言雖為執鞭猶欣慕焉者是也。既述此意矣。未乃極陳男女之情。雖有而不可求。則見文王之政化。被人深矣。○程子曰。之子者。若得之以歸。則言秣其馬矣。惟其禮法之限。不可得也。不止無非禮之私思。又知其端直之美而願慕之也。○蘇氏轍曰。此知女子之不可犯。而思以禮道之之辭也。○輔氏廣曰。悅之至。敬之深。則可見其性情之正也。悅之不敬。則便放佚矣。○何氏楷曰。秣馬謂親迎也。言人若欲娶此女。必待秣馬以行親迎之禮。庶可耳。寧可以非禮干之哉。

○翹翹錯薪言刈其萋。之子于歸言秣其駒。漢之廣矣不可泳思。江之永矣不可方思。

集傳 興而比也。萋萋蒿也。葉似艾。青白色。長數寸。生水

澤中。孔氏穎達曰。萋一名蒿。郭云。蒿萋。萋蒿也。生下田。初生可啖。江東用羹魚也。陸璣疏云。生食之。香

而脆美。其葉又可蒸為茹。駒馬之小者。毛氏萇曰。五

集說 王氏質曰。秣馬秣駒。皆游子欲求游女之意。卒有所抑畏而止。言不可犯也。陶氏所謂激清音以感

余。願接膝以交言。欲自往以結誓。懼冒禮之為譽。○徐氏鳳彩曰。樵薪者。即刈萋。猶以為為幸。興嘉會者。即秣駒

亦以為榮。

總論 輔氏廣曰。三章之末。皆終之以不可求之意。所謂言之詳。辭之複。所以見其敬慕。有不能自己之意

也。○沈氏守正曰。三章無淺深。各上四句。是欽慕其德。下四句。是沮息其干求也。

漢廣三章章八句

集說 孔氏穎達曰。作漢廣詩者。言文王之道。初致

之域。故男無思犯禮。女求而不可得。此由德廣所

及然也。此與桃夭皆文王之化。后妃所贊。於此言

文王者。因經陳江漢。指言其處為遠辭。遂變后妃

而言文王為遠近積漸之義。南國六州也。不言周

南者。以天子事廣。故直言南也。○鄭氏樵曰。周為

河洛。名為岐雍。河洛之南。瀕江。岐雍之南。瀕漢。江

漢之間。二南之地。詩之所起在於此。屈宋以來。騷

人辭客。多生江漢。故仲尼以二南之地。為作詩之

始。○朱子曰。漢廣汝墳諸詩。皆是說婦人。豈是文

王之化。只化及婦人。不化及男子。只看他意。恁地

拘不得。○漢廣游女。求而不可得。行露之男。不能

侵凌貞女。豈當時婦人蒙化。而男子則非。亦是偶

然有此樣詩說得一邊耳。○黃氏樵曰。此正文王風化。自北而南之時。○沈氏守正曰。二南詩當作兩項看。岐周久被文王之化。其民忘故。詩多熙皞而平。桃夭芣苢之類是也。南國新變淫慝之風。其心悔。故詩多滌洗而露。江漢行露之類是也。召南之所以不同於周南亦然。一采之都內。一得之列國故也。○王氏志長曰。案漢廣四語。意象宏遠。神理深微。商季淫風未殄。乃關雎化洽。頓令漢濱游女。覲面有難犯之色。采風者推厥所自。恍見王風過化存神。難以思議。真有若漢廣之不可泳。江永之不可方者。反覆長歌。此其所以謂之風也。不然游女既不可求。而見者獨流連低徊。則是篇乃後世高唐洛神一流文耳。何以爲周南乎。

遵彼汝墳。伐其條枚。

叶莫悲反

未見君子。惄

乃歷反

如

調張留反飢。

集傳

賦也。遵循也。汝水出汝州天息山。逕蔡潁州入淮。

皇輿表。宋汝州。今河南汝州。宋蔡州。今河南汝寧府。宋潁州。今江南鳳陽府潁州。

墳。大防也。孔氏

穎達曰。墳。謂厝狀如墳墓。名大防也。常武注云。水厝曰墳。則此墳。謂汝水之側。厝厝大防也。

枝曰條。

榦曰枚。孔氏穎達曰。木大不可伐其榦。取條而已。枚。細者。可以全伐之也。

惄。飢意也。孔氏

穎達曰。釋詁云。怒。思也。釋言云。怒。飢也。然則惄之爲訓。本爲思耳。但飢之思食。意又惄然。故又以爲飢。惄是飢之意。非飢之狀。故傳言飢意。箋以爲思。義相接成也。○以思食比思夫。故箋又云。如朝飢之思食。調一作朝。重也。王氏安石曰。調。飢。飢而。又飢。飢之甚也。

○汝芻之國。亦先被文

王之化者。故婦人喜其君子行役而歸。因記其未歸之時。思望之情如此。而追賦之也。

集說

歐陽氏修曰。周南大夫之妻。出見循汝水之墳。以伐薪者。為勞役之事。念已君子以國事奔走於外者。其勤勞亦可知。思之欲見。如飢者之思食爾。
○程子曰。君子從役於外。婦人為樵薪之事。

○**遵彼汝墳。伐其條肄。**反 **既見君子。不我遐**

棄。

集傳

賦也。斬而復生曰肄。孔氏穎達曰。肄。餘也。左傳曰。是屏。又曰。杞。夏餘也。晉國不恤宗周之闕。而夏肄是肄。為復生之餘。 **遐。遠也。**○伐其枚而又伐其肄。則

踰年矣。至是乃見其君子之歸。而喜其不遠棄我也。

集說

鄭氏康成曰。已見君子。君子反也。於已反得見之。知其不遠棄我而死亡。於思則愈。故下章勉之。○孔氏穎達曰。婦人以君子處勤勞之職。恐避役死亡。今既得見。知不遠棄我也。○黃氏樞曰。李迂仲辨以為庶人之妻。非大夫之妻。予以為詩人之意不在此。蓋此篇之意。其所以起興者。皆在於條枚條肄之句。枝曰條。幹曰枚。旁之斬而明年復生曰肄。託此以見其行役之久也。方其夫行役之時。見其人之伐其條枚。則思念之情已不能自已。今又見伐其條肄矣。歷時若是之久矣。庶幾見其不遠棄我也。詩人之意。大抵如此。蓋言其歲復歲而君子行役之未歸也。意豈在於伐薪之事哉。○黃氏佐曰。別離之久。而遂契濶之約。即是不遐棄也。

○**魴**符方反 **魚頰**敕貞反 **王室如燬**音毀 **雖則如燬**

周南

父母孔邇

集傳

比也。魴魚名。身廣而薄。少力。細鱗。

陸氏璣曰。魴一名魴。江東呼為

鱗。頰赤也。魚勞則尾赤。魴尾本白而今赤。則勞甚矣。孔氏

穎達曰。魴魚之尾不赤。故知勞則尾赤。左傳如魚頰尾。衡流而彷徨。鄭氏云。魚肥則尾赤。此自魴魚。尾本不赤。

赤故為勞也。王室指紂所都也。燬焚也。父母指文王也。孔甚

邇近也。○是時文王三分天下有其二。而率商之叛國

以事紂。故汝墳之人。猶以文王之命。供紂之役。朱子曰。傳云。文

王率商叛國以事紂。蓋天下歸文王者六州。惟青兗冀屬紂耳。○張氏栻曰。玩此詩。則民雖怨乎紂。而尚以周

之故。未至於泮散也。是文王以盛德為商之方伯。與商室係民心而維宗社者也。其家人見其

勤苦而勞之曰。汝之勞既如此。而王室之政。方酷烈而

未已。雖其酷烈而未已。然文王之德。如父母然。望之甚

近。亦可以忘其勞矣。此序所謂婦人能閔其君子。猶勉

之以正者。蓋曰。雖其別離之久。思念之深。而其所以相

告語者。猶有尊君親上之意。而無情愛狎昵之私。則其

德澤之深。風化之美。皆可見矣。一說。父母甚近。不可以

懈於王事。而貽其憂。亦通。劉氏向曰。周南大夫。受命平治水土。過時不來。其妻恐其

懈於王事。言國家多難。惟勉強之。無有譴怒。貽父母憂。乃作詩。○劉氏辰翁曰。父母行役者之父母也。

集說 鄭氏康成曰。君子仕於亂世。顏色瘦病如魚。勞則尾赤。所以然者。畏王室之酷烈。是時紂存。辟此勤

勞之處。或時得罪。父母甚近。當念之。以免於害。○孔氏穎達曰。箋言君子仕於亂世。不斥大夫士。王肅云。當紂之時。大夫行役。王基云。汝墳之大夫。久而不歸。樂詳等皆云。大夫則箋云。仕於亂世。是為大夫矣。若庶人之妻。扶杜言。我心傷悲。伯兮則云。甘心首疾。憂思皆在於情。性。豈有勸於德義。恐其死亡。若是乎。序稱勉之以正。則非庶人之妻。言賢者不宜勤勞。則又非為士。周南召南。述本大同。而殷其雷。召南之大夫。遠行從政。其妻勸以義。此引父母之甚近。傷王室之酷烈。閔之則恐其死亡。勉之則勸其盡節。比之於殷其雷。志遠而義高。大夫妻於是明矣。雖王者之風。見感文王之化。但時實紂存。文王率諸侯以事殷。故汝墳之國。大夫猶為殷紂所役。○

李氏樗曰。文王之化。非獨能使士大夫從於征役。以勉於王事。亦能使婦人勉其夫以正。此足以見文王之化盛也。○王氏質曰。王室在衛近汝。雖可畏不可往。然以近父母為懷。亦差慰也。此徵役渡河。趣都者。人情所不欲。其妻勉以君民之分。父母之情。蓋賢婦人也。○段氏昌武曰。勞苦莫難堪於身。嘗之久而嗟恨。猶深於痛定之餘。安其酷於無可奈何。而寄其心於文王。樂以忘憂也。○沈氏守正曰。二年行役。夫婦相見。形容色澤。必有改常者。故以賴尾喻之。而歎所以致此者。以王室之如燬銷鑠之也。周在西北。汝墳在極南。而云孔邇者。文王之德。漸被暨及。人遠而澤近也。

總論 王氏安石曰。前二章。篤於夫婦之仁。後一章。篤於君臣之義。○黃氏樗曰。文王事商。出於誠然。而不以一毫之偽介乎其間。至誠之理。可以通金石。化豚魚。故雖汝墳之婦人。亦皆以文王之故。而化其怨紂之心。

○輔氏廣曰。未見君子。怒如調飢。思望之情也。既見君子。不我遐棄。喜幸之意也。雖則如燬。父母孔邇。慰勉之辭也。未見而思。既見而喜。發乎情也。終勉之以正。止乎禮義也。此可見其情性之正矣。○劉氏瑾曰。婦人之伐。枚伐肄。則別其夫之久矣。怒如調飢。則念其夫之深矣。然其久別於行役之勞。宜有怨上之意。相見於深思之餘。宜有情昵之私。今乃有親上之語。以相慰。則可見文王德澤之深。而其無情昵之私言。則又可見文王風化之美也。

汝墳三章章四句

集說 陳氏傅良曰。汝墳。是已被文王之化者。江漢。是聞文王之化而未被其澤者。○朱氏公遷曰。漢廣變淫風。汝墳識公義。二詩見淺深之間。○朱氏善曰。周南十一篇。而南國之詩。僅居其二。何

也。曰。漢廣。汝墳之間。是非一國也。而其被聖人之化。則一而已矣。不錄。則無以見其風俗之美。盡錄。則又有不勝其可錄者焉。故錄一漢廣。以見其德之端莊。其性之靜一者。非特一女而已也。錄一汝墳。以見其意之忠厚。其志之專懇者。又非特一行役之婦人而已也。是時王化自北而南。故觀於桃夭。而見化之行於國中者如此。觀於漢廣。汝墳。而見化之行於南國者又如此。詩亦何以多為哉。

麟之趾振振君子嗟麟兮

集傳 興也。鄭氏康成曰。興者。喻公子有似於麟。麟。麇身。牛尾。馬蹄。毛蟲之

長也。許氏慎曰。麒麟。趾足也。麟。是行獸。以足而至。故言

麟之趾。麟之足。不踐生草。不履生蟲。陸氏璣曰。麟色黃。員蹄。音中。鐘呂。行中。規

矩行必擇地。詳而後處。不羣居。不侶行。振振仁厚貌。于

嗟歎辭。程子曰。麟趾有仁厚之象。既言之。又歎美之。曰。于嗟麟兮。○朱子曰。于嗟麟兮。指公子而言。

○文王后妃德修於身。而子孫宗族皆化於善。故詩人

以麟之趾與公之子。言麟性仁厚。故其趾亦仁厚。文王

后妃仁厚。故其子亦仁厚。然言之不足。故又嗟歎之言

是乃麟也。何必麇身牛尾而馬蹄。然後為王者之瑞哉。

彭氏執中曰。關雎之應。雖無麟而若麟之時。春秋之作。雖有麟而非麟之時。

集說 蘇氏轍曰。麟。仁獸也。其於仁也。非有意為之。其資之也。天矣。公子之賢。非其身為之。父母所以資之。

者遠矣。○輔氏廣曰。振振。毛傳以為信厚。然詩內初無信意。故先生從程氏以為仁厚。麟趾不踐生草。不履生蟲。有仁厚之意也。文王身修家齊。后妃又有賢德。而子孫宗族皆化而為善。則文王雖不王。而不害其為有王者之道也。有王者之道。則有王者之瑞。故以麟之趾為與。○嚴氏粲曰。于嗟麟兮。指公子。猶楚狂接輿稱仲尼曰。鳳兮也。○瞿氏景淳曰。詩只以麟之趾與公之子。其文王后妃仁厚。是高一層意。

○麟之定。反都佞。振振公姓。于嗟麟兮。

傳 興也。定。額也。孔氏穎達曰。定。或作顛。釋畜云的。顛。顛亦額也。麟之額未

聞。或曰。有額而不以抵也。嚴氏粲曰。有定者宜抵。公姓。惟麟不然。是其仁也。

公孫也。姓之為言生也。王氏志長曰。公姓。公孫。孫傳姓者也。

集說 范氏處義曰。麟有定而不抵。如公姓之不忤物。○朱氏謀埭曰。麟神物也。世不槩有。以此公子公孫不世出之。賢聖耳。

○麟之角。叶盧振振公族于嗟麟兮。

集傳 與也。麟一角。角端有肉。毛氏萇曰。麟角所以表其德也。○鄭氏康成曰。麟角之末有肉。示有武而不用。○何氏休公族。公同高祖。祖

曰。麟設武備而不為害。所以為仁。廟未毀。有服之親。禮記。同姓從宗。合族屬。繫之以姓。而弗別。注。始祖為正姓。高祖為庶姓。○左傳。衆仲曰。天子建德。因生以賜姓。胙之土而命之氏。諸侯以字為諡。因為族。注。諸侯位卑。不得賜姓。故其臣因氏。其王父字。或使即先人之諡。稱以為族。○劉氏瑾曰。公同高祖。與文王同高祖也。蓋亞圉之玄孫。文王

之三從兄弟。至武王時。然後亞圉服盡也。

集說 范氏處義曰。麟有角而不觸。如公族之不好競。○姚氏舜牧曰。公族。子孫之蕃衍成族者。始公子。次公孫。次公族。即後世所謂子孫賢族將大之意。

總論 朱子曰。興是以一箇物事。貼一箇物事。說如麟之一箇好底人。子也好。孫也好。譬如麟也好。定也好。角也好。○輔氏廣曰。一章言公子。二章言公姓。三章言公族。自近而遠。自狹而廣也。○謝氏枋得曰。麟一身之間。皆仁。曰趾曰定曰角。自下而至於上也。○朱氏善曰。此詩見麟性之仁者。其體雖不一。而固無一體之不一。始焉即物以興乎人。終焉因人而擬諸物。

麟之趾三章章三句

集傳 序以為關雎之應得之。

集說 孔氏穎達曰古者太平之時以麟為瑞文王
關雎之化能使宗族振振然如麟應之時無
以過也。○此篇本意直美公子。似古致麟之時。犬
師編之以象應。序者述以示法。○張氏栻曰麟出
於上古。蓋極治之日也。以紂之在上。而周之公子
振振仁厚。不減於極治之日。故詩人歌之。以為是
乃麟也。周取之以為關雎之應也。○嚴氏粲曰應
效應也。公子生長富貴。宜其驕也。今乃仁厚。豈非
關雎風化之效歟。公子猶仁厚。則他人可知。○熊
氏朋來曰麟以興西伯。非公子也。文王時為西伯
其子稱公子。于嗟之歎。詩人歎西伯有子。知武王
周公之將有為矣。○郝氏敬曰詩人託麟趾表聖
瑞。見文王修齊之化。成而周道大興也。

周南之國十一篇三十四章百五十九

句

集傳

案此篇首五詩皆言后妃之德。關雎舉其

全體而言也。葛覃卷耳言其志行之在己。樛木

螽斯美其德惠之及人。皆指其一事而言也。其

詞雖主於后妃。然其實則皆所以著明文王身

修家齊之效也。至於桃夭兔置采芣則家齊而

國治之效。漢廣汝墳則以南國之詩附焉。而見


天下已有可平之漸矣。若麟之趾，則又王者之瑞。有非人力所致而自至者，故復以是終焉。而序者以為關雎之應也。夫其所以至此，后妃之德固不為無所助矣。然妻道無成，則亦豈得而專之哉。今言詩者，或乃專美后妃，而不本於文王，其亦誤矣。

集說

朱氏善曰：周夫子之國，南。南方諸侯之國，謂之周南者，修齊治平之道，本之乎天子。達之乎諸侯，表立於此，而天下無不知所取正焉。法立於此，而天下無不知所取則焉。此化之

所以行而俗之所以美也。是時王道明盛，國不得異政，家不得殊俗，故以南之一字該之。則南方諸侯之風，皆可得而見矣。○黃氏佐曰：孔叢子曰：孔子讀詩，自周南至正雅，喟然歎曰：周道成矣。蓋周南詩皆醇正體裁畢備，此周道之所以成。正雅之所由作也。故孔子歎之。○鄧氏元錫曰：王業基於岐周，王化起於閨門。化行而南，故首周南。昔者文王慎明德，穆雍以刑厥家。后妃配之，求賢善，成孝敬，美德義，以明章坤順。關雎葛覃，卷耳作焉。其言不出於閨門，而其究以宣教輔化，順性命之理。召天地之和，豈非盛哉。

欽定詩經傳說彙纂卷第一



Faint, mostly illegible text within a rectangular border, possibly bleed-through from the reverse side of the page.

